

四庫全書

史部

欽定四庫全書

史部  
浙江通志卷十六  
七

詳校官給事中<sub>臣戴璐</sub>

檢討<sub>臣</sub>德生覆勘

總校官編修<sub>臣</sub>倉聖脉

校對官中書<sub>臣</sub>朱圻

謄錄監生<sub>臣</sub>趙廷麒

欽定四庫全書

浙江通志卷十六

山川八

台州府

臨海縣  
附郭

大固山 赤城志在府西北按舊經晉隆安末孫恩

為寇刺史辛景休於此鑿塹守之恩不能犯遂以

名山宋紹興間道士費德泓斷地得晉斷碑有龍

顧山字故又名龍顧山

小固山 臨海縣志在城東南二里與大固山相望

高七十丈周四里

巾子山 赤城志在州東南一里連小固山兩峯如

恰幘頂有雙塔

涼鶴翻游巾子山詩絕頂新秋生夜涼鶴翻松露滴衣裳前村月照半

江江僧在翠微開竹房任翻再游巾子山寺詩靈江水上幘峯寺三十年來兩度登野鶴尚巢松樹

頂竹房不見舊時僧任翻三游巾子山寺感述詩清秋絕頂竹房開松鶴何年去不回惟有前峯明

月在夜深猶過半江來吳景奎登台州巾子山詩岸竈雙峯著此身危巔夜半見朝曦天低古塔參

雲闕江近寒潮落海門恰幘風高仙已去翠微僧老鶴長存下觀城郭紅塵隘水色山光自吐吞



龍井 輿地紀勝在巾子山西麓舊傳龍伏於此常有雲氣騰空建浮圖鎮之

臨海縣

城外山川

蓋竹山 赤城志在縣南三十里按輿圖志云一名竹葉山中有洞名長耀寶光之天周回八十里洞淵集所謂第十九洞天也雲笈七籤云仙人商邱子治之道藏洞天記及名山記皆云蓋竹山福地觀壇各一所有竹如蓋故以為名明一統志抱樸

子言此山可合神丹漢末有陳仲林輩四人得道

於此上有香爐天門二峯最為游覽之勝

林一龍游茲竹

洞記初從浣紗溪入登巖見大海海門諸山行十餘里乃至巖谷散峙或如列屋或如樹碑或如厦屋或如城壁最外一大石側下有穴斜入多蝙蝠湯君達作記號為寶光長耀洞天引司馬子微說為仙人商邱子所治其事甚異唐仲友游蓋竹山詩藍輿東出雨初收衆山卷霧奔蒼虬麥田幪幪連千疇去年見種今有秋農家稅大即快活使君不去能無羞春光欲盡誰挽留千林薺薺新綠柔桐花遠近澹無思自開自落長悠悠洞天為我開霽色使君蠟屐窮冥搜天門發秀萬馬下水口離立犀峯稠瀑泉對面瀉絕壁竇劔却倚丹鳳樓溪聲噴薄雷震動石色古怪神剜鏤洞天呀哈風颭

曉香爐峯下蛟龍湫中岑特秀小為貴左右旌節  
森戈矛幾年秘奧一日睹談笑指示君知不精廬  
但欲占勝處專事棟宇非良謀飛廊跨水納佳氣  
突兀堂殿居上頭軒窓高下有奇致洗滌肺腑明  
雙眸我將於此栖羽流鳳笙鶴駕應來游丹成一  
舉凌九州下視濁世如浮漚靈祠欵謁路阻修層  
巖傾澗邃且幽經營輪奐亦未就揮金爾助何須  
求晚雲漠漠鳴雨鳩僕痲泥滑我欲休虹橋列炬  
趣歸騎城鼓已報初更籌追扳別乘聊復爾乘興  
何如王子猷習池不為倒載去兒童不用拍手攔  
謳街

牛極山 臨海縣志在縣西北一十里上有平坡數

十畝可遠眺

靖江山 明一統志在縣東七里上有塔俗名白塔  
山舊傳辛景休破孫恩於此

少雨山 台州府志在縣東九里舊傳築城時較其  
土稍輕故名

東掖山 赤城志在縣東北四十五里以其居天台  
左掖故名上舊有隔塵寺

赤山 輿地紀勝在縣東南一百三十里絕頂有古  
塔塔之下有石函盛小銅塔內有銀壺盛舍利舊

傳梁王蕭詧所施

白鶴山 嘉靖浙江通志在縣東南二十里太平御覽昔有白鶴飛入會稽雷門鼓中擊之聲振洛陽故名太平寰宇記山上有深湖中有盤石山前有石鼓晏公類要臨海記云山中有隱泉懸溜遠望如倒挂白鶴名挂鶴泉

白巖山 台州府志在縣西十二里舊名白馬唐天寶六年改今名

真隱山 太平寰宇記在縣西南四十里高一萬六

千丈周三百里與仙居韋羗山接本名枯蒼又名

天鼻王方平居崑崙往來羅浮枯蒼山即此唐天

寶中改今名

神仙傳山上石壁有蝌蚪字高不可識宋元嘉中遣名畫圖於團扇焉

許孝山 臨海縣志在縣西北七十里名勝志舊傳

有許姓者居喪至孝每慟則羣鳥悲鳴因以名山

龍符山 臨海縣志在縣東一百七十里赤城志輿

地志云章安縣東五十里海際有覆釜山臨海記

及寰宇記云東海有山形如覆釜吳越春秋云吾  
得覆釜書除天下之災而劉世軌記云夏帝登此  
山得龍符之瑞唐天寶六年改今名山有巨跡相  
傳夸父逐日所踐云

臨海山 赤城志在縣東北二百四十里接海本牛  
頭山以石似故名唐天寶六年改今名

秀麗山 赤城志在縣東二百里海中舊名芙蓉臨  
海記云州東北七十里海中有芙蓉山僧智顗傳

云出海望芙蓉山竦若紅蓮之始開蓋指此也唐  
天寶六年改今名

石塘山 明一統志在府城西三十里上有石峽飛  
瀑注塘中水底有石柱日朗即見俗呼龍盤石

石新婦山 赤城志在縣東北七十里東瀕海太平  
寰宇記山旁有奇石如婦人狀宋文帝常遣畫工  
摸寫山狀時人盛圖於白團扇

宜山 明一統志在府城西六十里其巔平行良疇



可十頃有潭瀑沾溉旱不能災

岐山 臨海縣志在縣東南六十里

石鼓山 赤城志在縣東一百五里臨海記黃石村  
山上有石似鼓兵興則鳴

玉峴山 太平寰宇記在縣東一百七里舊名黃石  
山一名黃石巖相傳黃石公居此天寶六年更今  
名山洩水九層沿厓注落如白練

上足山 赤城志在縣西南一十一里一名戲龍西

接真隱山南連永嘉西南連枯蒼有石井龍湫巖  
上有瀑布高十餘丈歲旱必禱焉

海門山 明一統志在縣東南一百二十六里相對  
如闕在海北岸東枕海

金鰲山 明一統志在縣東南百里章安鎮東有小

洞相傳昔人艤舟夜見一物起波間光采注射迫

視乃一巨鰲金色故以為名

輟耕錄山枕海屬臨海縣章安鎮宋高宗

在潛邸日泰州徐神翁獻詩曰牡蠣灘頭一艇橫  
夕陽西去待潮生與君不負登臨約同上金鰲背

上行及南渡建炎庚戌正月三日帝航海次章安鎮落帆福濟寺前候潮見此詩在寺壁間題墨若新方信其為異人也

白山 輿地紀勝在縣東南二百五十里按臨海記云白山望之如雪其上有湖舊傳金鵝於此集焉

合旗山 輿地紀勝在縣東一百三十里舊傳僧灌頂居攝靜寺會有海寇至頂講經自若寇見旌旗耀日有神皆丈餘懼而遁因以名山

東刊山 台州府志在縣東七十里東南接黃巖因

禹隨山刊木故名

將軍山

一名天柱山

赤城志在東刊山南烈女馮光奴

死節處旁有峯蜿蜒如蛇一名蛇山

天門山 赤城志在縣西六十里高數千仞

望海尖山 台州府志在縣東北四里後嶺上甚高

聳宜遠眺土人多以為田麥時翠浪翻浮最為可

愛

青珠山 輿地紀勝在臨海縣

仙石山 臨海縣志在縣東北二十里太平寰宇記  
山有石步廊觸石雲起崇朝必雨即王方平所遊  
之地

日山 赤城志在縣西五里以其面東朝日視諸峰  
獨高故名

常風山 嘉靖浙江通志在縣西五十里有石穴風  
常自中出故名

古塘門山 臨海縣志在縣南二十里兩峰對峙中

空十餘丈舊傳海門在焉

新羅山 赤城志在縣西三十里與八疊山相望

燈壇山 太平寰宇記在縣西六十里舊圖經云山

有石壇每陰雨有火望之如燈故名

鴻鶴山 臨海縣志山有二一在縣西七十里一在

縣西北六十五里

九盤山 赤城志在縣東南七十五里以其路縈迴

九轉故名絕頂可眺大海

亭山 輿地紀勝在縣南一百里其地有寨由郡泛舟入黃巖者候潮於此

翠環山 台州府志在縣東南一百三十里峰巒回合有若環翠故名

高相山 赤城志在縣東北一百三十五里一穴無際會稽圖經云與海通

高麗頭山 赤城志在縣東南二百八十里海中自此山下分路入高麗國其峰突立宛如人首故名

清潭山 台州府志在縣西二十五里夷堅志舊有  
陂廣十餘里淳熙間大水推一山納陂中山之大  
小正與陂等林木宛然

芳溪山 臨海縣志在縣西三十五里深窅可百里  
通仙居黃巖有水源深遠溉田甚多

葛溪山 台州府志在縣西三十五里俗稱葛仙翁  
煉丹處有石如藥礪狀有禮斗壇壇上有湫頗深  
宵霧雨晝冥有龍宅焉



三山 台州府志在縣東七十里有三巖聳異賀氏  
世居此唐賀瑄與二姊殉父赴水後顯靈建廟於  
此

崛門山 太平御覽在縣東一百五十里山腹有孔  
上達於頂其中有聲即大風水涌主兵吳將平孔  
內有聲遠達十里

大雄山 臨海縣志在縣東二百一十一里

頭扣山 台州府志在縣東北二百一十一里西有

嶼

鷺鼻山

舊浙江通志在縣東一百五十里狀如鷺

鼻吸水

石佛山

舊浙江通志在縣東南一百七十里以狀

名

蛟巉山

在縣東南一百八十里

蒼郭山

在縣東北二百一十一里其西有蒼郭村小

門山大門山

在縣東南一百里

壽昌山

在縣東一百五十里

莆門山

在縣東南一百五十七里

東麂山

在縣東一百五十七里

西麂山

在縣東一百六

十主山 在縣東南一百七十里 麂頭山 在縣東南一百八十里 虎頭山

在縣東北二百六里 澤青山 在縣南二 檉澳山 在縣東北二百八十里

伯達山 在縣東北二百八十里 嶼山 在縣東北二百八十里 澤山 在縣東北二百

八十 里 舊浙江通志以上俱海中山

雲峰 台州府志在縣西南十九里峰極高聳外望

諸山宛若聚米鄉邑江湖舉在目前

玉峰 臨海縣志在縣西北七十里俗名白石尖又

名大石鄉勢凌霄漢

聖巖 台州府志在縣南二十里錢柱山號險絕舊傳有神躍馬於此故名至今有馬蹄痕又名馬蹄巖

桐巖 台州府志在縣東五十里接寧海縣界

仙巖 臨海縣志在縣東一百二十里高廣數百仞中有石竅廣四畝名百花洞

黃礁巖 台州府志在縣東一百七里南臨江東西北俱平川穴出一巖方圓四十餘丈高十丈餘無

土樹歷年不凋

新羅嶼 臨海縣志在縣東南三十里昔有新羅賈人艤舟於此

竹嶼 台州府志在縣東一百四十六里海中

馬嶼 台州府志在縣東一百七十里

新嶺 臨海縣志在縣南三十五里自大左嶼至嶺脊分臨海黃巖界

蔡嶺 台州府志在縣東八里

飛霞石 輿地紀勝在蓋竹山舊傳仙人上昇於此  
石累三層牧豎戲其上以手轉之不墜

常風洞 赤城志在縣西四十里中極幽邃舊有石  
闌護之宣和中常駐兵於此

招賢洞 赤城志在縣西六十里以寺名宣和寇難  
以其地險遣將據守

臨海江

一名雙江

元和郡縣志二水合成一是始豐溪

一是樂安溪至州城西北十三里合台州府志縣

東二十里受諸溪之水諸山抱之不能東與海接  
故西南流經規橋開石新橋諸村過少兩山與靈  
江合寶郡治東襟界水也

靈江 台州府志在府城外西北自三江匯流抱城  
而東舊志稱中有一泓名陳婆坳泓水極清巨潮  
澎湃不為動舊以此水釀酒宋嘉定中台州有靈  
江風月之名延慶院記曰濟靈江而西唐任翻詩  
曰靈江江上巾峰寺是江之得名久矣

三江 嘉靖浙江通志在縣西十里其源有二一自天台關嶺一自仙居永安二溪至此合為靈江故曰三江潮汐至此而止故其流溪清而江濁

椒江 台州府志在縣東南一百二十里合靈江永寧江同流出海實受臨黃天仙四邑之水江面寬二十餘里南則海門衛北則前所兩城對峙為台區要隘皆明初湯和建築

東湖 赤城志在崇和門外三十步初為船塢水軍



營熙寧四年錢守暄始開為湖凡一萬六千步

曾宏

父題東湖詩三年領客醉東湖欲去猶携竹裏廚誰解挽留狂太守風湖十頃翠相扶

虎溪 臨海縣志在縣東六十五里源出東掖山南

五里合流中沙溪舊傳宋獻穆公主有目瞽僧法

腴洗以咒水而愈奏置十八賢座倣廬山遠公故

以為名其泉曰大悲泉

芳溪 台州府志在縣西三十里流出括蒼山

詳見水利

百步溪 明一統志在縣西北六十里前後二灘石

險湍激俗名大小惡溪唐孟浩然詩欲尋華頂去  
不憚惡溪名是也台州府志宋乾道中邑令陳居  
安修治水稍平明弘治二年郡守馬岱疏鑿別道  
七百餘丈害未盡去後邑人蔡潮募工重修舟始

無患因易其名為大善灘

互見水利

玉泉 臨海縣志在縣東北白雲山下以水色而名

黃樸玉泉詩水性能方圓泉色常瑤璧雲山靜有  
輝瓊液來無迹泉上修禪人曹溪分一滴鑑止更

澄源紛紛  
萬緣息

康濟泉

嘉靖浙江通志在縣東南二十五里靈康

廟後宋乾道三年令顏度禱雨於廟見堦前水津

津迸溢遂穴地得泉

楊萬里康濟泉詩東泉千年流不休西泉千年亦不涸臨

海使君一念作猿鳥未知泉已覺殿角西頭枯石根向來原無泉眼痕一朝擘崖迸膏乳却與東泉作賓主令君已昇金掌中白鶴古祠煙雨濛父老思君難再得登亭飲水三嘆息祝君令台壽千百

丹井泉

臨海縣志在天慶觀昊天殿後舊傳茅盈

鍊丹於此

仁泉

台州府志在縣東北三十里宏光寺後大旱

不涸灌田千餘畝俗名旋塘

楓山泉 臨海縣志在海門白楓山頂廣盈四丈深

丈有咫寒冽甘潔湛碧浮藍在山巔而不涸近海  
畔而不鹹

海 台州府志在縣東一百八十里潮汐自海門直  
至縣西三江與天台仙居二水相接宋洪邁志東  
海中有尾閭與海門馬筋相值自高山望之其水  
湍急陷為大渦十餘舟楫不可近舊傳東海洩水

處南由黃巖太平達溫州北由寧海達寧波

黃巖縣

永寧山 赤城志在縣東五里因古縣而名巖壁峻  
峙四望皆方正故一名方山

大仁山 赤城志在縣東十五里山巔有二池大旱  
不涸上有大仁寺

委羽山 嘉靖浙江通志在縣南十里俗名俱依山  
赤城志山東北有洞世傳仙人劉奉林於此控鶴

輕舉常墮翮焉故名按真誥云委羽山天下第二

洞天號大有空明之天

王十朋游委羽山詩龜山斂翠日開屏羽客逍遙此

閉扁早起留雲閑放鶴夜來伴月靜縉經巖前方  
石看多好竈裏丹砂且是靈應有赤城鸞鳳過一  
聲長嘯入青冥左緯游委羽山詩委羽不知何處  
是倩人扶上木蘭橈欲尋去路花梢密爭認行雲  
酒浪搖流水忽如山脚轉洞天疑把杖頭  
挑逡巡不覺東風晚始有仙人弄玉簫

屏山 輿地紀勝在縣南八十里東西二石聳立如

屏有古藤纏絡之冬寒不凋西屏因風雨仆為二

矣

石磕山 洞天福地記第三福地在台州黃巖縣

唐門山 黃巖縣志在縣北五里中有將軍巖甚鉅

松巖山 輿地紀勝在縣西十五里沿崖而上石梯

數百級勁直如削或云王仙姑輕舉之地

黃綰松巖詩捫

葛黃昏上翠微天風松影正交飛石壇坐處聞秋  
葉鳥道行時見古扉入海泥牛今幾歲埋雲真骨  
未傳衣惟餘巖下同禪  
席客至還來不忍揮

東山 台州府志在縣東二十五里

西山 台州府志在縣東二十五里東山對峙故名

石壁山 明一統志在縣南八十里上有石壁挿水  
中宋虞仲房刻詩於石云野草閒花洞口春碧潭  
如鑑淨無塵江山好景携不得漾入酒尊和月吞  
東鎮山 赤城志在縣東二百四十里中有四壩極  
險峻山上望海中突出一石舟之往高麗者必視  
以為準焉

三童山 黃巖縣志在縣西南一十七里山有三峰  
各高十餘丈遠望似童子香積寺記云昔有三童



子出沒其側跡之皆化為石故名

三峯山 赤城志在縣西六十里初至下峯則兩山  
夾一水而入其勝處號雲莊風磴次至中峯二里  
許兩石蹲踞號石門又四里即上峯有洞空濶尤  
勝

岱石山 赤城志在縣西南一十七里又有一石橫  
前如櫃號石櫃山

靈巖山 名勝志在縣北一十里又名鷲峰後有飛

瀑垂崖而下緒為潭深不可測

翠屏山 台州府志在靈巖之右山如屏障俗呼翠

屏

黃巖山 明一統志在縣西一百二十里一名仙石

山俗傳仙人王方平居此

鷄籠山 嘉靖浙江通志在縣南二十五里值晦冥

之夜輒有光焰天日晴霽則滿山若金玉然

大屏山

一名  
尖峰

台州府志在縣南一十五里其山逆

水上走又名金字巖

張羽大屏山詩小檻鉤簾處  
晴共倚碧空林腰雲氣白秋

水泛芙蓉

下洋山 黃巖縣志在縣南一十八里相傳地震惟  
此山不動

徐山 台州府志即彭城山縣南三十五里

龍鳴山 嘉靖浙江通志在縣南一百二十里上有  
龍湫舊傳龍鳴其上

柏嘉山 台州府志在縣西三十五里每旱禱山鳴

即雨又云鳴山

大田山 黃巖縣志在縣西三十五里上有蓮花峰

下有龜嶼

華巖山 台州府志在縣西四十五里

篤孝山 黃巖縣志在縣西三十五里宋南渡後有  
鮑雍者自饒徙居山下孝養其親故名

馬家山 台州府志在縣西四十里

靈石山 赤城志在縣西五十里以甘露降名甘露

山臨海記云山上有奇石當孫恩叛毀木為船石  
從空自墮賊以傷去故名為靈石

夏鳥山 台州府志在縣西六十里

平田山 黃巖縣志在縣西六十里山極崇峭至巔  
有地平衍故名

浮山 輿地紀勝在縣西七十里特起田間四無聯  
屬俗傳一夕風雨浮至故名

青龍山 台州府志在縣西七十里其形蜿蜒如龍

故名

塵山 台州府志在縣西南三百里永寧江源出此

瑞巖山 名勝志在縣西北四十五里山石皆紫朱熹

瑞巖山詩踏破千林黃葉堆林間臺閣鬱崔嵬谷泉噴薄秋逾響山翠空濛晝不開一壑祇今藏勝

槩三生疇昔記曾來解衣正作留連計未許籃輿却便回

李家山 黃巖縣志在縣西北一百五十里

六潭山 台州府志在縣北一十五里朱文公常著

書於此名為小樊川題曰溪山第

觀音巖 台州府志在縣極東瞰大海有穴可坐數十人其中常有光明

幞頭巖 黃巖縣志在縣西四十五里狀如幞頭夜晦冥或有火如炬

西巖 台州府志在縣西七十里金溪中有竅久晴鳴則雨久雨鳴則晴

五部嶺 黃巖縣志在縣西一百一十里東連五部村西連樂清西北連永嘉東北連蒼山東南連桐

嶺故名五部

義城嶺 黃巖縣志在縣西五十里按臨海縣舊志  
云其南二十五里即茅畚鋪

大唐嶺 台州府志在縣南三十五里接太平界

佛嶺 台州府志在縣西南三十五里與樂清分界

山客嶺 台州府志在縣西六十里入樂清界

新嶺 台州府志在縣西北四十里最高峻北抵臨

海界



大有空明洞 名勝志在委羽山昔有道士東炬入

洞中行數日聞櫓聲返輟耕錄委羽山特立不倚

形如落鳳故得名中藏洞穴所謂空明洞天也

范宗

尹游大有空明洞詩暫到山中禮法壇空明雲氣逼人寒當年孤鶴知何處遙想天風墮羽翰

永寧江 赤城志源出縣西北三百四十里有大小

二源大源出塵山小源出黃巖山從縣北入於海

青湖 台州府志去縣三十里俗傳晉時孫恩常解

金甲於其中湖底有一竅深不可測土人謂與耀

珠潭相通

黃巖溪 黃巖縣志在縣西一百里源出黃巖山派

為諸川凡五十餘

縣志時黃巖溪計得雨溪聲壯無風雲氣多山花依翠竹灘石

亂寒莎樵父谷中出牧兒牛背歌逢人間塵世擾擾意如何

九溪 台州府志在縣西三十五里柏嘉山下諸溪凡九西角二大溪合流以達永寧江

日溪 嘉靖浙江通志在縣西六十里黃巖縣志西

北有小谷曰金玉灣

軍營溪 台州府志在縣西三十里源出佛嶺宣和  
中官軍禦寇結營於此故名

錦溪 台州府志在縣西七十里兩岸多桃李花時  
望之如錦故名每大旱水忽自漲次日必雨

白龍潭 赤城志在縣東一十里方巖其穴有三大  
僅如甕常有雲氣罩之居人見龍出入色白故以  
名潭

赤頰潭 黃巖縣志在縣西五十里亂山中龍出入

必大風雨故近山無居人旁有大木皆無膚葉父  
老言有龍黑身赤頰遂名潭

柵眉潭 赤城志在縣西九十里柏都洞南怪石壁  
立過者悚懼年豐則有雲氣覆其上雖炎日不散  
歟歲則否

藏雪潭 赤城志在縣西北一十里即鳴山之鳴川  
潭舊傳五六月間積雪不消遂更今名

天台縣

天台山 天台山志在縣北三里按舊圖經載陶隱  
居真誥云高一萬八千丈周回八百里山有八重  
四面如一當斗牛之分上應台宿故曰天台又十

道志謂之頂對三辰登真隱訣謂大小台處五縣

中央

五縣謂餘姚句章臨海天台  
剡縣孫賦中所謂五界也

或號靈越孫興

公賦所謂蔭牛宿以曜峰托靈越以正基是也

或謂

天台山據越地之靈以正基  
址爾非以靈越為天台也

今言天台者蓋山之

都號如桐柏赤城瀑布佛壇香爐華頂東蒼皆山

之別名大概以赤城為南門石城為西門據神邕所記如此而徐靈府小錄又以剡縣金庭觀為北門蓋指山之所至言抱朴子內篇云諸山不可煉金丹以其皆有水石之精惟太華少室緡雲羅浮及大小台正神居之助人為福可以修煉又山讖云曲豆女台可以避災然則地為靈仙所宅尚矣明一統志山去天不遠路由福溪水險而清前有石橋廣不盈尺長數十丈下臨絕澗惟忘其身然

後能濟濟者梯巖壁援藤葛始得平路見天台山

蔚然奇秀雙列於青霄上有瓊樓玉闕天堂碧林

醴泉仙物畢具也

孫綽游天台山賦天台山者蓋五嶽之神秀也涉海則有方

丈蓬萊登陸則有四明天台皆元聖之所游化靈  
仙之所窟宅夫其峻極之狀嘉祥之美窮山海之  
環富盡神人之壯麗矣所以不列於五岳闕載於  
常典者豈不以所立冥奧其路幽迴或倒景於重  
溟或匿峯於千嶺始經臆魅之途卒踐無人之境  
舉世罕能登陟王者莫由禋祀故事絕於常篇名  
標於奇紀然圖像之興豈虛也哉非夫遺世玩道  
絕粒茹芝者烏能輕舉而宅之非夫遠寄冥搜篤  
信通神者何肯遙想而存之余所以馳神運思晝  
咏宵興俛仰之間若已再升者也方解纓絡永託

茲嶺不任吟想之至聊奮藻以散懷太虛遼濶而無閼運自然之妙有融而為川瀆結而為山阜嗟台嶽之所奇挺實神明之所扶持蔭牛宿以曜峯託靈越以正基結根彌於華岱直指高於九疑應配天於唐典齊峻極於周詩邈彼絕域幽邃窈窕近智者以守見而不乏之者以路絕而莫曉晒夏蟲之疑氷整輕翮而思矯理無隱而不彰啟二竒以示兆赤城霞起而建標瀑布飛流以界道睹靈驗而遂徂忽乎吾之將行仍羽人於丹丘尋不死之福庭苟台嶺之可攀亦何羨於層城釋域中之常應暢超然之高情被毛褐之森森振金策之鈴鈴披荒榛之蒙龍陟峭嶠之崢嶸濟槽溪而直進落五界而迅征跨穹窿之懸磴臨萬丈之絕冥踐莓苔之滑石搏壁立之翠屏攬樛木之長蘿援葛藟之飛莖雖一冒於垂堂乃永存乎長生必契誠於幽昧履重險而逾平既克躋於九折路威夷而修



通忘心目之寥朗任緩步之從容藉萋萋之纖草  
蔭落落之長松靚翔寫之商裔聽鳴鳳之嚶嚶過  
靈溪而一濯疏煩想於心胸蕩遺塵於旋流發五  
葢之遊蒙追義農之絕軌躡二老之玄踪陟降信  
宿迄於仙都雙闕雲竦以夾路瓊臺中天而懸居  
朱闕玲瓏於林間玉堂蔭映於高隅彤雲斐亶以  
翼樞皎日炯晃於綺䟽八桂森挺以凌霜五芝含  
秀而晨敷惠風佇芳於陽林醴泉涌溜於陰渠建  
木滅景於千尋琪樹璀璨而垂珠王喬控鶴以冲  
天應真飛錫以躡虛騁神變之揮霍忽出有而入  
無於是游覽既周體靜心閒害馬已去世事都捐  
投刃皆虛目牛無全凝思幽巖朗咏長川爾乃羲  
和亭午游氣高寒法鼓琅以振響衆香馥以揚烟  
肆覲天宗爰集通仙挹以玄王之膏漱以華池之  
泉散以象外之說暢以無生之篇悟遺有之不盡  
覺涉無之有間混色空以合跡忽即有而得玄釋

二名之同出消一無於三幅恣語樂以終日等寂  
默於不言渾萬象以冥觀兀同體於自然李白送  
楊山人歸天台詩客有思天台東行路超忽濤落  
浙江秋沙明浦陽月今游方厭楚昨夢先歸越且  
盡秉燭懽無辭凌晨發我家小阮賢剖竹赤城邊  
詩人多見重官燭未曾然興引登山屐情催泛海  
船石橋如可渡攜手弄雲烟孟浩然尋天台台山詩  
吾友太乙子餐霞卧赤城欲尋華頂去不憚惡溪  
名歌馬憑雲宿揚帆截海行高高翠微裏遙見石  
梁橫李郢重游天台詩南國天台山水奇石橋危  
險古來知龍潭直下一百丈誰見生公獨坐時賈  
島送僧歸天台詩辭秦經越國歸寺海西峯石澗  
雙流水山門九里松曾聞清禁渴却憶赤城鐘妙  
宇研磨講應齊智者踪貫休春日行天台山詩重  
重太古色濛濛花雨時好峰行不盡流水語相隨  
黑壤生紅木黃猿引白兒因思石橋路曾與道人

期王十朋過天台山詩目送神仙路丹城未暇躋  
雪深封佛龕雲暗鎖桃溪流水無復有亂山高且  
低欲尋劉阮洞歸路恐成迷鄭善夫天台雜詩一  
夜雨聲吹不斷國清寺前溪水鳴欲過天台拾瑤  
草秋風無限石梁情韓昌黎天台詩望裏天台近  
羣峯秀幾重回看青嶂斷忽有白雲封絕壁垂樵  
徑春泥陷虎蹤石橋  
今夜月應為照長松

赤城山 赤城志在縣北六里一名燒山又名消山

石皆霞色望之如雉堞因以為名孫綽賦所謂赤  
城霞起以建標是也絕頂有浮屠七級梁岳陽王  
妃所建支遁天台山銘序云往天台山當由赤城

為道而神邕山圖亦以此為台山南門云天台縣志山之麓有巖極深廣晉義熙初僧曇猷造寺號中巖齊僧惠明復就塑一佛名卧佛又有巖二曰結習曰釋籤蓋灌頂湛然遺跡也西有玉京洞北有金錢池上有仙人井飛流噴沫冬夏不竭神僧傳赤城山有孤巖獨立秀出千雲釋道猷搏石作梯升巖宴坐接竹傳水以供常用王羲之聞而輒往仰峰高挹致敬而返

桐栢山 天台山方外志在縣西北二十里七十二  
福地之一唐司馬子微隱此舊圖經云周靈王太  
子主金庭治桐栢山即此也太平寰宇記登真隱  
訣云金庭不死之鄉方四十里

瓊臺雙闕兩山 天台山方外志自崇道觀西北行  
二里至元應真人祠由真人祠取道仙人跡經龍  
潭側凡五里至瓊臺轉南三里至雙闕皆翠壁萬  
仞森竦相向孫綽賦所謂雙闕雲竦以來道瓊臺

中天而懸居是也

夏竦瓊臺雙闕銘瓊臺巖案左  
右如闕直上相等蘿交蔓結啟

閑雲氣出入日月千流萬綫羣  
峯如屑凌霄歷海吞吳跨越

寒巖山

方輿勝覽在縣西北七十里亦名寒石其

山幽邃當暑有雪天台縣志因寒山子得名前有

磐石曰宴坐峰上有石室舊名拊石洞後米芾題

曰潛真四山環峙如郭郭上矗雲漢其下嵌空置

佛屋不用瓦覆由宴坐西有石梁可數尺架兩崖

間險峻不可陟南有泉如屋雷寺僧縻竹綆引之

前距山腹一里有道人洞轉西二里亂石灑流巖  
竇間散若虬髯因號龍鬚洞台山絕勝處也臨海  
記云石室前有立石參差五色遠望如綬帶舊傳

為綬帶山

寒山子山居詩登陟寒山道寒山路不窮溪長石磊磊澗澗草蒙蒙苔滑非關

雨松鳴不假風誰能起世累共坐白雲中郭三益  
寒巖山詩道人栖碧山雲居在空曲十年海潮音  
外物緣已熟時攜貝葉書步入深林讀宵視護禪  
虎畫引穿花鹿庵中三昧語藥我貪嗔毒何當脫  
雙髯藜杖  
追高躅

明巖山 天台縣志在縣西七十里舊名暗巖巖之

前峭壁屹立勢摩穹蒼亦號幽石其下竅穴透邃  
日光穿漏中有僧全宰棲真洞轉北數步怪石森  
然上有兩峯倒側號合掌巖西有泉蔽巖而下渙  
若垂箔寺僧亦用竹縆引之從高下墜號曰水索  
由寺北捫蘿而下至重巖磐石品列即三隱嘯咏  
之地常有光如月號石月寺東有響巖擊之聲鏗  
然寒山子詩所謂重巖我卜居鳥道絕人跡是也  
方瀛山 赤城志在縣西北二十八里唐長慶中徐



靈府居此寶歷元年賜今名

東橫山 名勝志在縣東十里俗名覆船山本天台

山足其山坦夷中有三溪冬溫夏冽

許渾宿東橫山賴許孤舟

路漸賒時見碧桃花溪雨灘聲急巖風樹勢斜獨  
猿垂弱蔓鵲鵲臨橫槎漫向山林宿無人識阮家

鳳皇山 台州府志在縣東十一里

折山 天台縣志在縣西十六里神邕山圖云峭嶮

險折而中峯拔立孤秀舊傳王喬控鶴於此又名

鶴峯

蒼山 赤城志在縣東四十里按神邕山圖云其山  
凌映桐栢絕頂睇滄海

司馬悔山 雲笈七籤在天台山北係第十六福地  
李明仙人所治之處天台山方外志舊傳司馬承  
禎隱天台山被召至此而悔因以為名

大盆山 名勝志在縣西一百八十里西接東陽南  
界仙居遙望如覆盆即婺江之源也

始豐山 台川府志在縣西南十五里舊以狀類盤

龍名龍山唐天寶中更今名

靈壚山 天台方外志在縣北三十里白雲先生  
隱處圖經云七十二福地之一

瀑布山 天台方外志在縣西四十里嘉靖浙江  
通志一名紫凝山有瀑布陸羽品為天下第十七  
水與福聖國清二瀑為三云名勝志神異記云餘  
姚人虞洪入山采茗遇一道士牽三青羊引至瀑  
布下曰吾丹丘子也聞子善具飲常思見惠山中

有大茗可以相給

寶華山

天台山方外志在縣東三十里產花蕊石

八峯山

天台縣志在縣西北六十里中有萬年寺

所謂八峯明月婆羅香爐大舍銅魚藏象烟霞應

澤是也

覆盆山

天台山方外志在縣西四十里形家以為

台郡臨海山川之美皆自此胚胎迤衍發秀

千佛山

始豐類稿在天台西五十里層巒疊嶂森

鬱秀拔與赤城玉霄華頂諸峯角勝

鷓鴣山 宋瀛天台廣濟橋記天台縣西二十里有山曰鷓鴣二水發源其間合流至長洋復折而西與大溪匯龍湫志要常有鷓鴣鳴故名

銀山 天台山方外志在縣南十里宋元祐間因礦發故名天台縣志明萬厯間三次開採無銀遂廢方山 天台山方外志在縣西六十里高峻千餘丈周十五里自足至頂皆方故名

妙山 台州府志在縣東二百步延袤一里邑之鎮山也

華頂峰 赤城志在縣東北六十里蓋天台第八重最高處高一萬丈少晴多晦夏有積雪絕頂有望海尖瀰漫無際下瞰衆山如龍虎蟠踞旗鼓布列之狀草木薰郁殆非人世僧智顓與司馬子微常

晏坐修真焉

李紳題華頂峯詩欲向仙峰煉九丹獨瞻華頂禮真壇石標琪木凌天碧

水挂銀河映日寒天外鶴聲隨絳節洞中雲氣隱琅玕浮生未有從師路空誦仙經想羽翰

五峰 赤城志在縣北一十里國清寺側其峰有五  
曰八桂曰靈禽曰祥雲曰靈芝曰映霞前有雙澗  
合流南注大溪

九峰 嘉靖浙江通志在縣西北三十里周圍九峰  
曰紫霄曰翠微曰玉泉曰卧龍曰蓮花曰華琳曰  
玉女曰玉霄曰華頂矗立霄漢遠近相向王羲之  
與支道林常往來此山赤城志舊名九壘唐天寶

六年改今名

皮日休寄題玉霄峯葉涵象尊師所  
居詩青冥向上玉霄峯元始先生戴

紫蓉曉案瓊文光洞壑夜壇香氣滿杉松間迎仙  
客來為鶴靜嚙靈符去是龍仔細捫心無偃骨欲  
隨師去肯相容陸龜蒙和詩天台一萬八千丈師  
在浮雲端掩扉永夜祇知星斗大深秋猶見海山  
微風前幾露青旄節雪後應披白羽衣  
南望烟霞空再拜欲將飛魄問靈威

九折峰 赤城志在縣東北三十里孫綽賦所謂既  
克濟於九折路威夷而修通是也

百丈巖 赤城志在縣西北二十五里崇道觀西北  
與瓊臺相望

翠屏巖 赤城志在縣東二十五里孫綽賦所謂搏



壁立之翠屏者是也龍湫志要山形壁立如屏故名

靈巖 天台縣志在縣西五十里巖洞虛迥有石如案與浙嶠山相連中有小嶼號曰文嶼左右魚石盤列映帶

八桂嶺 天台山方外志在縣北五十里地理記天台山有八桂巖孫綽賦所謂八桂森挺以凌霜是也

杜潭嶺 天台縣志在縣南二十五里與臨海分界

闕嶺 天台方外志在縣西北四十里與新昌分

界

斤竹嶺 台州府志在縣東四十五里與臨海分界

顧儒嶺 赤城志在縣東南一十五里按輿地志舊

名東岫有齊顧歡讀書堂後人因以為名今嶺旁

有歡溪歡塢且有顧姓居之或其苗裔也

招隱嶺 天台方外志在縣東北五十里昔顧歡

招同郡人杜京產隱此

察嶺 赤城志在縣西二十里與金地嶺接漢高察  
所隱之處

金地嶺 赤城志在縣西二十里

王京洞 赤城志在縣北七里赤城山右益第六洞

天茅司命所治或號太上王清天或號王真清平

天會稽記云許邁常居之

余疑王京洞詩半山松  
柏散天聲芝蓋當年憇

赤城我是上皇芸閣  
吏王京應有舊題名

丹霞洞 明一統志在縣北一十五里舊傳葛元煉  
丹處傍有仙人拍手巖飛瀑數百尺下為靈溪

桃源洞 名勝志在縣西北二十里一名劉阮洞續

齊諧記漢永平中有劉晨阮肇入山採藥迷道得  
桃實食之覺身輕行數里至溪澍有二女方笄笑

迎以歸留半載謝去至家子孫已七世矣

元稹題  
劉阮洞

詩仙洞 千年一度開等閒偷入又偷回桃花飛盡  
秋風起何處消沉去不來芙蓉暗內綠雲鬢畫

樓臺青黛山千樹桃花萬  
年藥不知何事憶人間

石橋 方輿勝覽在縣北五十里即五百應真之境

相傳為方廣寺有石梁架兩崖間龍形龜背廣不

盈咫其上雙澗合流洩為瀑布西流出剡中梁既

峭危且多莓苔甚滑下臨絕澗過者目眩心悸

趙湘

石橋詩白石峰猶在橫橋一徑微多年無客過落  
日有雲歸水淨苔生髮山寒樹著衣如何方廣寺

千古去人稀張雨方廣寺石橋詩綠玉飛梁碧蘚  
封羽人來倚瀑簾風偶翻貝葉經臺上與散曇花

碧椀中有象到頭終幻滅無生彈指即虛空春寒  
大展三衣坐百衲雲山一線通高攀龍登華頂峯

遂至石梁觀瀑布詩晨策臨絕頂夕栖入浚谷攢  
峯插天表飛瀑掀地軸昧險驚前賞升虛騁極目

春風淡冲襟朝曦扇輕燠深桃點澗紅弱柳抱溪綠想見桃花源人胡麻飯應熟神仙不可期念此媚  
獨幽

斷橋石 台州府志在縣北七十里自石橋沿澗行

可十五里至此一石中斷因以為名下臨危澗亂

石碁布雖邑人亦罕至云

薛師古斷橋石詩獨扶瘦杖欲經過為問高僧

意若何自倚神通能渡水却言佛法本無多

始豐湖 明一統志在縣南因晉縣為名

玉湖 台州府志在縣西十里廣百步長五里許俗

呼馬湖

詳見水利

青溪 赤城志在縣西五里源出天台山南流入大溪按謝靈運登臨海嶠詩云旦發青溪陰俗呼為清者誤

靈溪 嘉靖浙江通志在縣西北一十五里孫綽賦所謂過靈溪而一濯是也

大溪 台州府志在縣西南五十步源出婺州東陽縣受始豐天台桐柏之水順流而下凡八十七里

至二江

檣溪 名勝志在縣東三十里一名油溪赤城志孫綽賦所謂濟檣溪而直進是也

乾溪 赤城志在縣南二十五里舊傳僧曇猷訪赤城有一媪與之語神怒投媪於淵猷飛錫救之其溪立涸故名

百丈潭 赤城志在瓊臺雙闕間翠蔓蒙絡水聲淅然盤澗遶麓出為靈溪



丹霞潭 台州府志在縣西北二十里柳泌煉丹處  
柘溪潭 明一統志在縣西北三十里水極泓深前  
橫石檻又有石室可容百人

惠澤潭 天台縣志舊名惠濟在石梁之下其龍甚  
靈宋嘉泰元年大旱致禱甘雨均洽令上其事賜  
龍君額曰惠澤輿地紀勝嘉泰四年夏雷雨湧出  
金銀藏錢圓徑六寸餘文曰太平通寶太宗朝賜  
以鎮潭者

卓錫泉 台州府志在智者嶺智者注湟槃經處

龍鬚泉 明一統志在縣西寒巖洞口噴薄如龍鬚

因名

應心泉 天台志要在萬年寺西宋叅政賀允中宅於

此泉自湧出允中自為記

墨池 台州府志華頂峰有王羲之墨池在李白書

堂側

仙居縣

括蒼山 台州府志在縣東南四十里高一萬六千

丈登之見東海又名天鼻巉巖四絕俯瞰諸山綿

亘三百餘里殆台婺溫處四郡之岳云

互見處州府縉雲縣

福應山 明一統志在縣東二里宋皇祐間縣令陳

襄名之赤城志陰陽家謂其居邑龍首得地之勝

居人建浮圖其上自是取青紫不乏

漁潭山 仙居縣志在縣東南五里下瞰深潭每二

三月桃花盛開巨魚如織

安洲山 台州府志在縣東南五里舊名九旬山宋  
羅適作唐僧灌頂記云師止安洲以波瀾四絕乃  
誓曰使地坦夷當就講焉未浹旬而沙涌地平朱  
文公熹題為第一山

紫籜山 名勝志在縣北三十里舊名竹山唐天寶  
中更名

東山 仙居縣志一在縣西北六十里一在縣西南  
三十五里一在橫溪之北縣西七十里

孟溪山 台州府志在縣西北十里宋宣和寇起民  
保聚其間寇至見雲霧杳冥草木間旗幟隱隱懼  
不敢犯民賴以全

綵仞山 名勝志在縣北二里其下有溪

青圭山 台州府志在縣北十餘里一名青尖即紫  
籀山之趾上有峰如圭聳然特秀左右二小峰若

輔弼然雄踞縣治後東北界天台西北連東陽

陽澹山 仙居縣志在縣南四十里一名陽峰上多

沃田登之萬山皆伏

桐林山 赤城志在縣西南五十里

張阜山 嘉靖浙江通志東瞰縣治南環以溪北有  
壘及柘溪諸處泉谷深秀舊傳逸民張阜居焉

翠屏山 仙居縣志在縣西南四十里

水簾山 明一統志在縣西南四十里有瀑若簾垂  
四時不竭

韋羌山 台州府志在縣西南四十里險峻難升上

有石室戶牖至春深霧重樵者隱隱聞鼓聲蓋神  
仙所宅也赤城志按臨海記云上有石壁刊字如  
科斗晉義熙間周廷尉為郡造飛梯以蠟模之莫  
識其義俗傳夏帝踐歷故刻此石

陳襄題韋羗山  
詩去年曾覽韋

羗圖云有仙人古篆書千尺石  
巖無路到不知科斗是何如

峽山 赤城志在縣東南一十五里衆峰拱揖列岫  
迂迴致侔川峽故名

萬竹山 赤城志在縣西南四十五里絕頂曰新羅

九峰回環道極險隘嶺上叢薄敷秀平曠幽窈自

成一村

薛昂萬竹山詩萬竹山中數十家重重流水遶桑麻飽餐鼓腹成何事桃李春風任

自  
花

石龕山

赤城志在縣東一十五里上有石室深三

丈廣踰一丈俗傳神靈栖焉

瓏崆山

名勝志在縣西南十五里山多玲瓏巨石

枕海山

仙居縣志在縣西北十五里俗傳其趾

與海通潭水潮汐相應



玉儿山 仙居縣志在縣西南五十里金山下俗呼  
為船巖山

金山 台州府志在縣西南五十里舊十三都境俗  
傳謂之鵝頸山

靈山 名勝志在縣西二十里禽鳥不敢棲

白冠山 台州府志在縣西六十里舊傳曾有仙人  
戴白冠往來其上又曰白鶴山以是山常產鶴也  
林谷深邃背接東陽縉雲界

凌雲山 台州府志在縣西八十五里石屏山在其下旁有一巖形似將軍名隱將巖

披雲山 仙居縣志在縣西南五十五里遙望烟雲繚繞紛披如畫

小桐山 仙居縣志在縣東南三十里烈女湖在其麓

王姥山 名勝志在仙居縣界亦名天姥山相傳古仙人所居

晒馬坪山 台州府志在縣東北五十里其頂坦平  
廣可數頃中有古湫蔭溉甚遠

三井山 赤城志在縣北三十里以有三龍湫故名  
鑊底山 台州府志在縣西南六十里與盛旄山連  
紫岷山 仙居縣志在縣東北八十里由盧岢山進  
接天台界

道赭山 台州府志在縣西南一百里山南即永嘉  
界通張溪

嵩山 台州府志在縣西九十五里一名陽岸嶺孤峰高聳壁立千仞與蒼嶺接

白馬山 仙居縣志在縣西南一百一十里西接縉雲相傳勾踐避兵過之失白馬於此

浮石山 嘉靖浙江通志在縣南三里下有巨石屹立溪中視之若浮

楓田山 台州府志在縣南八十里

南峰 赤城志在縣南三里其巔四面軒舒山水環

擁為邑人遊覽之最

白巖山 仙居縣志在縣南十五里

景星巖 台州府志在縣西南五十五里幽邃迂折

繞二十四盤而上

潘耒仙居諸山游記景星巖絕類巨艘山脚四飛為其橈棹有

石柱峯龍湫澗響巖摘星臺諸奇

方巖 台州府志在縣東南四十五里朱溪上西境

潘耒仙居諸山游記方巖乃無數石笋攢列成城如排簫編笙駢拇枝指萬仞削立不可階梯張鍾斗方巖詩聞道方巖勝捫蘿絕頂尋閣空雲不散心寂鳥相親竹引千林籟松連十里陰問僧修幾

世掛納  
此禪林

麻姑巖 赤城志在縣西南二十五里麻姑訪王方

平於此故名巖上有洞兩石相峙有麻姑像存焉

蒼嶺 嘉靖浙江通志在縣西北九十里高五千丈

周回八十里界於縉雲重岡複徑隨勢高下險峭

峻絕為東浙最仙居縣志與枯蒼山通故名一名

風門 劉昭禹蒼嶺詩盡日行方半諸山直下看白  
雲隨步起危徑極天盤瀑頂橋形小溪邊店

影寒往來空太  
息玄髮改非難

界嶺 仙居縣志在縣東三十七里與臨海白水洋  
鋪分界

游鳩嶺 台州府志在縣東南五十里蒼山之趾通  
臨海石塘界

王坎嶺 仙居縣志在縣西南一百六十里與金處  
二郡接壤之地

桃花洞 台州府志在縣南三里南峰山側大溪環  
其足每當二三月桃花盛開爛熳若錦

盧明章秋  
日遊桃花

洞詩憑高試一望秋色滿平蕪山缺邀雲補崖傾  
倩石扶渴虹多飲澗怪鳥自呼雛坐覺斜陽盡峻

增塔  
影孤

枯蒼洞 赤城志在縣東南三十里枯蒼山之間按

塵外記枯蒼成德隱元之天蓋第十洞天列仙所

居在台之樂安即仙居舊邑也又寶藏名山記云

枯蒼洞周回三百里徐真人所治此洞與處之王

虛宮通自枯蒼嶺而言東則屬台西則屬處明一

統志宋光宗在東宮時書瓊章寶藏四字鎮之

劉光



枯蒼洞詩古洞藏真不記年翠崖蒼壁故  
依然怪來一夜清無夢身在仙家第十天

相湖 台州府志在縣東二十里昔於湖中得石刻  
有相湖二字

烈女湖 仙居縣志在縣東南二十七里嘉靖間因  
顧烈女於此捐軀全節故名

大溪 仙居縣志在縣西南八十里源發永嘉界坑  
山北流百餘里至四都始開廣遠郡之三江

互見水利

永安溪 赤城志在縣西二百一十里

櫟溪 赤城志在縣西二十里源出處發溫三州流  
同夢溪入大溪孟大武詩云樵斧斫雲春谷暗漁  
榔敲月夜溪寒人甚稱之

曹溪 赤城志在縣西九十里源出括蒼嶺南流四  
十里入大溪嶺上有潭曰曹潭淳熙十四年令蘇  
光庭禱雨忽有物蜿蜒而出一黑一黃以磬承之  
躍而入遂迎止於潭下翊日大雨遂築室以祠

龍幻潭 台州府志在縣東北四十里昔有兩龍幻

為人詣僧曰我二人乃龍也僧求其現形云以翌  
午為期戒勿鳴鐘至次午果見兩龍盤旋廊柱頭  
角崢嶸僧懼撞鐘寺遂漂沒水退見潭其深莫測  
瑤崩瀑 赤城志在縣西五十里玉几山緣壁而下  
或雨初霽則飛流濺沫廣至十餘丈蓋奇觀也

月落池 仙居縣志在縣南七里前山宋時郭氏夢  
月落於地而女生後為宋理宗后即謝深甫之孫  
女也

九井 明一統志在縣東南二十五里一名蔡經井  
每汲其一八皆波動今僅存其五

七井 仙居縣志宋朱文公所鑿一在鼓樓前一在  
學宮右一在縣東巷一在縣南前巷一在官倉巷  
一在市橋巷一在天井巷

浙江通志卷十六

欽定四庫全書

浙江通志卷十七

山川九

金華府

金華縣  
附郭

上山 萬歷金華府志在縣西北隅太守蘇遲謝政  
居此今為縣治所倚又縣東南一里為芝麻山一  
名油麻山

望仙嶺 金華縣志在旌孝門內登嶺可望赤松山

七寶渠 金華府志自城北麓八郎塘發源南行穿城入由七寶寺側迤邐出祠堂巷經四牌坊永濟倉前至八咏門外從河流入雙溪

清渠 萬歷金華府志發源隕星塚從景行坊轉入東市街至赤松門外流入大溪

西市渠 金華府志從景蘇坊合流會縣前轉入無相寺巷內穿城西入於濠

金華縣

城外山川

城山 聚寶山 嘉靖金華縣志俱在縣東三里城

山宋王埜所居埜記云予家負城面山在井邑如  
郊藪西偏隙地由園扉而入名曰城山又曰東溪  
一曲宛轉來朝溪上諸峰秀潤如玉平蕪遠樹荒  
碕斷岸一望無際聚寶山一名商山宋學士商日  
新居此

龍鱗山 金華府志在縣東八里一名興教山山石  
錯落如龍鱗

至道山 嘉靖浙江通志在縣東三十里一名覆釜  
又名積道連屏擁翠石磴縈紆絕頂平坦如掌折  
而南曰焦巖石壁平峭高可百丈長一里環障溪  
流人望之如赤壁云

東山 金華縣志在縣東五十五里自東陽之大盆  
山迤邐而來周三百里其東隸東陽南即武義之  
八素山其高巘曰齊雲岡

葛公山 金華縣志在縣東七十五里一名葛仙峰



五峰卓立霄漢抱朴子煉丹處

風門山 宋瀛風門洞碑在縣東南五十里有山曰  
風門山有石洞莫測所底風蓬然從中出襲人毛

髮

屏山 名勝志在縣南五里一名琴望山又名赤山  
沐塵山 嘉靖金華縣志在縣南二十五里

石門山 嘉靖金華縣志在縣南二十五里有石對  
峙如門黃文獻公集云婺城南有山曰石門水乘

高而下者三級人稱之曰龍山即謂此也

銅山 太平寰宇記在縣南三十里東陽記云山下有泉水色鮮白號曰銅泉

玉笥山 萬歷金華府志在縣南三十里山有石人峰高三百丈

南山 金華府志在縣南三十五里分脉自括蒼山北來凝結於此高幾倍北山周四百餘里其南為遂昌松陽宣平其東為永康武義其西為龍游其

北為縣鄙

白原山 嘉靖浙江通志在縣南四十五里高千餘  
仞列二百餘峰

馬秦山 舊浙江通志在縣南一百里

果愚山 金華府志在縣西南二十五里形如果愚  
王魯齋柏講學其中

望山 金華縣志在縣西南二十五里宋樞密俛普  
退隱於此每登之以望臨安故名

芙蓉山 名勝志在縣北十五里金華縣志一名潛岳又名尖峰山方輿記云孤山秀特狀若芙蓉故名

智者山 舊浙江通志在縣北十五里

方鳳金華遊錄智者寺山

路有亭扁北山唐乾元二年緡雲令李陽冰篆書

赤松山 萬歷金華府志在縣北十五里一名卧羊

山即黃初平

黃一作皇

叱石成羊處其山往往白石錯

落如羣羊散牧初平號赤松子故山以是名

葉審言亦

松山詩井龜仙踪在林巖曙色分苔荒一徑雨松  
隱半峰雲啼鵲催春事歸驂帶夕暉試呼黃道士  
石几薦桐君吳景奎赤松山詩雙鶴冲天去不回  
五雲繚繞散花臺山中若見皇初起為問留侯幾  
度來巖良道赤松山詩早發東郭門晚憩北山址  
乍離城市喧益羨邱壑美舍車涉嶇嶇停策玩清  
泚游目蒼崖巔放情白雲裏攀林感落英涉澗悲  
逝水冀憑栖道踪往遇冥寂士忽見山阿人彷彿  
平輿起何當乘素烟相與嚼丹蔬牧羊事已  
乖煉石情徒止長揖謝荒祠永媿爾兄弟

梁山 金華府志從赤松山進約十里

煉丹山 舊浙江通志在縣北十八里赤松山志高  
數千尋一望數百里近在目睫蓋二皇君煉丹之

所葉審言煉丹山詩仙家只在白雲堆井竈千年閤綠苔安得更如黃犢健五年四度入山來

金華山 萬歷金華府志在府城北二十里一名長

山自天台赤城發脉至東陽之大盆山迤邐至此

横亘金華蘭谿義烏浦江之境周三百六十里山

巔雙巒對矗曰王壺曰金盆壺中有湖名徐公湖

水分兩派而下其瀉乎山之陽者由山橋而達於

溪其注乎山之陰者由鹿田而入於洞山前兩崖

對峙高數百仞過脉至芙蓉峰郡治之主山也

世說

新語林公見東陽長山曰何其坦迤注引會稽  
土地志云山靡迤而長此縣因山而得名也 赤

松山志周回數十里即赤松山是也抱朴子云此

地可以居神免五嶽洪水之患

廣博物志金華山北有仙洞俗呼為

劉先生隱身處其內有三十六室廣三十六里石  
刻上以松炬照之云劉巖字仲卿漢室射聲校尉  
當恭顯之際極諫被貶於東甌隱迹於此莫知所  
終即道士蕭至元所記也劉峻山棲志予所居東

陽郡金華山東陽實會稽西部是生竹箭山川秀  
麗臯壤夔鬱若其羣峰疊起則接漢連霞喬林布  
蔭則春青冬綠迴溪映流則千仞洞底膚寸雲合  
必千里雨散信卓犖爽塏神居與宅曹唐皇初平  
入金華山詩莫道真游烟景賒瀟湘有路入金華  
溪頭鶴樹春長在洞口人間日易斜一水暗迴間

繞澗五雲長往不還家  
白羊成隊難收拾  
喫盡溪邊巨勝花

鹿田山 萬歷金華府志在縣北二十五里上有沃野可耕此山多生奇石金華雜識劉宋時有玉女馴鹿耕山中常入城市貿易以物置角間刻期而歸遂名其地為鹿田

太陽嶺 名勝志在縣東北五十里俗傳嶺與太陽齊高故名踰嶺即浦江縣界

黃姑嶺 萬歷金華府志在縣東北五十里宋宣和



中方臘冠婺邀項德於此

紫薇嶺

方輿勝覽在縣西北二十五里有石室梁

劉孝標棄官舍其下撰類苑

紫顓登九龍山訪孝標遺跡月下飲酒詩

杖藜扶我登九龍輕鞋短袂隨天風九龍飛去幾  
千載雲開秋老青山空孝標先生骨應朽清名與  
山同始終荒烟衰草迷古洞唯有皎皎棲青楓酒  
邊半醉弄明月月光忽落酒杯中舉杯歡笑和月  
吸清光散入照我突兀礪魄之孤衷平生所蘊剛  
毅氣洞然明白無隱容信知古人嗜好不在酒愛  
其果能助發英銳志始信醞釀麴蘖有奇  
功興懷不盡下山去明月又在天南東

石碕巖 嘉靖金華縣志在縣東三里又名石碕頭

下瞰大溪高十餘丈巖下有洞相傳嘗見梅花泛出故名梅花溪又名梅花洞郡城一帶東偏跨其

上

折竹巖 金華府志在縣北二十里金華山之陽太平寰宇記云赤松羽化處

金華洞 萬歷金華府志在縣北三十里周五百里道家所稱三十六洞金華洞元之天其洞有三巍然在上去天若尺五者曰朝真冽然在中有泉若

擊鼓輦之聲者曰冰壺豁然在下有石若白龍之  
升降者曰雙龍赤松山志與赤松山相接分上中  
下三洞上曰朝真中曰冰壺下曰雙龍上洞有石  
真人儼然臨跨莫測端倪中洞有水簾直下寒玉  
橫飛其間有石像石笋等下洞有石龍虎獅象麟  
鳳鐘鼓之類難可枚數下洞門極低非舟不可入

非燭不可見此洞天原係赤松所轄

硯北雜志金華洞有韓无

咎諸人題云淳熙改元七月既望陳巖子象陳良祐天與黃捷子餘趙師龍德言韓元吉无咎觀稼

秋郊自智者山來謁雙龍洞篝燈蒲伏徧問乳石之狀寒氣襲人酌酒竹陰支筇至中洞飲泉乃歸程瑛游金華三洞記出蘭溪門行可十餘里至上中下三洞下洞石壁卓立水深三尺人仰卧舟中羣僕岸立用竹竿薪入丈餘乃登岸仰視石門去人面僅四五寸舉火燭四壁壁有題名皆五代國初人不見風日墨跡如新中有搗藥白白潤可三尺有泉正滴其中終歲不滿旁有仙人田邱陌井井有耕犁跡又有仙人衣如摺疊羅帛洞中有蝙蝠大如鴉白如玉正類坡仙所記碧落洞中蝙蝠觀已乃出洞約濶十丈許此下洞也中洞有水簾飛涎濺沫有石壺深不可測足指不謹則墮其中幸有石天窗光燭其處此中洞也上洞亦有石天窗其石如亂雲如堆砌崩裂欲落人皆不敢仰視然亦亘古至今終不落也中有洞房側身乃可入上有玉女端坐如觀音纓絡具備觀音之前有泉

蜜甘能愈疾人既飲復嘗挈以歸偕行者八人其  
七不能登畏其險也方鳳賦三洞詩金華北山三  
洞天垂髻欲往金華巔春風吹衣雨洗屐瘦節忽  
柱蒼山烟山高地平走幽澗根絡石上森楠榭步  
從飛橋瞰石洞屋色閨世知幾年風痕霧迹化異  
物龍首昂左尾右旋就中暗穴如墓頤急水瀉碧  
鳴媧弦溯流束炬照徒涉肩背擦石行拳擊水窮  
路坦內景得以炬交燭窮幽元細紋感波涌浪接  
皓彩凝雪飛霜鮮大為獅子虎犀象瑣碎亦復蜂  
屯然蜿蜒雙蟠角尾具一一玉爪拏蒼堅穿龜負  
甲色深墨長蛇白質相縈纏鐘能鐘聲鼓能鼓不  
假機策知誰縣直樛斜檻藏涵室短畦長町移原  
田青雲白霓五色石笑畫敗絮留丹鉛中途經過  
最深宵伏身低眺洞口泉空明一隙隔遠見秋蟾  
浴海光嬋娟左巖架衣額橫亘疊摺威蹴垂踠蹊  
自餘神怪不可極似鑿非鑿鑄非鑄出登山腰叩

中洞外視石井開游潺入深蹈險思縋綆長竿揭  
炬後且先水簾可俯心為掉到此十九歸言迺嗜  
奇不憚歷磊砢足以日故差輕便翻身却望水簾  
處銀河天落懸吾前常情疑復下百尺積水定作  
神龍淵石乾徑闕却易進王筍按地修而圓宜為  
淵處乃為屋亦或摩蘇題新篇同游怪我久未出  
笑謂豈欲井底眠林幽風起日已晚猶晚高洞山  
之巔薪蒸可買樵我導不遠數里仍攀緣傍從石  
壁入深折如鐵戶限瓊為榜儼然海相挂珠絡熟  
視始信非夸傳右為朝真正面入便想笙鶴遨羣  
仙雲霞波濤仙衣袂奇詭豈必下洞專歛然修梁  
架巖起左右蒼白龍形全望中極底勝漆黑雙扉  
隱隱起半邊天光一道燭扉內知此明罅從何穿  
窗深碧峭不可住安得挿羽如飛鳶嗟余茲遊尚  
牽俗身所驟歷辭難宣但思乞  
水學坡老洗眼看字消餘年

石室洞 赤松山志在螺螄巖之側即赤松子引小  
皇君入山修道之所

九龍洞 萬歷金華府志在紫薇巖東洞口偃僂可  
入中昏黑持炬前進深莫可測去洞數百步有泉  
涌出與百盤溪合

優游洞 赤松山志去赤松巖十里洞門高五尺許  
自左升梯而入虛曠如大厦數十間又出於三十  
六洞天之外壺天真人所治之區萬歷金華府志

一名上霄洞縣東北三十里金華山之南

徐公湖

太平寰宇記郡國志云在長山上周圍四

百八十六步昔山下居人徐公登山至湖逢見二人共博自稱赤松子安期先生酌湖中水為酒飲徐公醉及醒不見二人而宿莽攢聚其上徐公乃追悔後因名焉

赤松澗

太平寰宇記赤松子遊金華山以火自燒

而化故山上有赤松祠澗自山出故曰赤松澗



雙溪 名勝志在城南一曰東港一曰南港東港源

出東陽縣大盆山經義烏西行入縣境又匯慈谿

白溪玉泉溪坦溪赤松溪經石碕巖下與南港會

南港源出縉雲黃碧山經永康武義入縣境又合

松溪梅溪水遶屏山西北行與東港會於城下故

名

梁安世雙溪詩春霖漲合兩溪平雪浪中浮桑柘青南市喚船撐未到一番蓑笠滿津亭

潛溪 萬歷金華府志發源金華山南流十里入航

慈溪

梅溪 金華府志發源武義大家山東北流合南山之箬陽上干下干及下坂之水入焉又八里為梅灘經赤山潭乃為鷓鴣灘金錢灘達於郡城與東港合是名雙溪疊石架屋為通濟橋以通閩廣諸道

長樂溪 晏公類要郡國志云郡界有長樂溪葛洪游處

坦溪 嘉靖金華縣志在縣東三十里發源金華山

西南流入雙溪東派與玉泉赤松並稱三溪

通元溪 金華府志發源赤松鄉玉壺山南流至潛  
岳東紫巖沙溪東南行環城後諸山蓋郡城之左  
峽水也其地有蔣波灘停為深潭乃造弘濟橋維  
舟於其上西北即抵郡治經八咏灘與南港會以  
通溫台諸郡

蘭谿縣

天福山 金華府志在城中距縣半里居民環列山

麓縣署正東旋轉南嚮此山擁護縣右故風氣完聚民物蕃盛甲於東浙

銅山 蘭谿縣志在縣東十里接金華山之西山石

似銅故名

洞巖山

一名靈洞

名勝志在縣東二十里東北一峰怪石

屹立人稱小飛來峰峰下有泉曰天池泉清鑑毫

髮沿流而出為桐溪山口有天井山石高百餘丈

下有天井龍潭

于石洞巖山詩萬疊風光水滴衣清泉白石瑣烟扉半山落日樵相

語一徑寒松僧獨歸  
葉墜悞驚幽鳥去  
林空不礙斷雲飛  
層崖峭壁疑無路  
忽有鐘聲出翠微

金龍山 金雞山 嘉靖浙江通志俱在縣東二十

里金龍山麓有金龍廟金雞山中峰拔起兩峰旁

夾

紫巖山 正德蘭谿縣志在縣東二十五里山上有

巖狀如覆釜穹窿深廣可容百人其色紫黑故名

牛石山 嘉靖浙江通志在縣東二十五里山多怪

石遠望如牛

大寺山 名勝志在城東南矗拔數十丈山巔及趾  
俱有佛刹正德蘭谿縣志延袤五七里不一其名  
西南下臨大溪曰倉嶺東南曰芝巖山南為塢口  
山又東南為費隴山山兩旁夾嶼中有達道數里  
上通金華正統末括蒼盜起常於此作木寨以禦  
寇焉

古城山 正德蘭谿縣志在縣東南二十里山脊有  
城周二三里缺處如門

南住山 正德蘭谿縣志在縣南十五里其山自閩  
南迤邐千餘里而來至此截然而住故名

九峰山 太平寰宇記在縣南六十里下有唐中書  
侍郎徐安正讀書巖

蘭陰山 萬歷金華府志在縣西南六里其山多蘭  
絕頂有橫山塔太平寰宇記一名橫山臨截三江

方率性游蘭陰山詩幽期在雲壑適意登嵯峨緬  
循雙溪曲復總重巖阿風日正清美烟霞眇紛羅  
踈松抱孤秀霜葉辭寒柯靜觀萬物理幽契良已  
多何當繼芳躅携琴重來歌梅庚蘭陰山詩絕頂

攀難到樵青導我行減衣驚地暖却杖關身輕遠  
水風帆小高窗霜葉明茲游成不意差慰滯留情

甘棠山 蘭谿縣志在縣西南十二里鄉以此名

東柏山 名勝志在縣西南二十五里東溪流於其  
下近西曰瑞山昔產瑞麥故名又五里曰社山山  
上多嘉禾

龍門山 蘭谿縣志在縣西南三十里狀若游龍上  
有蒼松六七里夾道如門故名

佛山 嘉靖浙江通志在縣西二十餘里上有洞深



不可測山麓怪石蹲踞如伏虎龍

桂竿山 萬歷金華府志在縣西二十五里相傳山下有井人飲其水多生勇士因而塞之其旁高峰呼為將軍山

白石山 名勝志在縣西四十里其石如玉又名玉華峰左四五里有大石高數百丈飛泉直下溜石成溝又左四五里有石柱高百丈周十餘丈蘭谿縣志山腰有洞陰不可登洞中雲起其日必雨

硯山 名勝志在縣西四十里高數百丈盤亘二十餘里山頭平正有池如硯

仁山 嘉靖浙江通志在縣西四十里舊有仁山書院為金履祥講學之所

風子山 太平寰宇記在縣西六十里上有葛洪丹竈基址

烏石山 正德蘭谿縣志在縣北八里名勝志與黃大山相連本一山以石色蒼黃而異名又十里有

水山山多流泉泉有三源上曰鮑源中曰盛源下  
曰繆源各深十餘丈近東曰金臺山夜每有光西  
曰秦龍巖高一丈深廣五六尺

豹山 金華府志在縣北二十里山形似豹故名上  
有石平正如几可列尊罍

獅山

一名石蓮山

舊浙江通志在縣北二十五里

潘之淙游

石蓮山記辛未冬日過蘭谿聞石蓮山水奇勝期  
二三友人同往由南門十里入山徑在兩山之間  
崩崖上出絕壑下注行者率屏氣度不敢俯仰又  
十餘里度一小橋過橋十里即石蓮山也舊名獅

山以其峰巒秀簇如蓮瓣故易今名曰已暮宿於  
山房朝起飯後入山山徑紆折如長蛇出草所謂  
十二曲也鹿門兩石高聳如垣中開一竇由竇而  
進則石梁梁本天成爲樵子所斷今以一石峯橫  
亘而度度石梁則石蓮洞也洞門窄而中敞可容  
千人上平如砥惟石乳數百垂垂而下再入則爲  
凌翠樓樓倚石壁而起陰邃幽窅萬木森合由斯  
而下有青壁高數十仞依壁鑿石磴數百級僅容  
趾下磴越澗則枕漱亭亭上望雙瀑如雙龍下飲  
洒烟透日奪人目睛時日亭午天漸暖乃脫巾理  
策而進徑益險俯澗皆梅花積如殘雪未消行  
六七里乞漿於山家勢不可再入尋徑而歸

香山 名勝志在縣北三十里山產玉蘭無葉而花

白有香故名下有香溪

東山 正德蘭谿縣志在縣北三十里香溪之東

范浚

東山詩烟嶂鬼鬼列翠屏松山高下鬱蔥青風生萬壑笙竽觸擬向林間築小亭

解石山 名勝志在縣北五十里名小桃源

玉壺山 蘭谿縣志在縣北六十里洪武中長史滕

浩歸隱是山號玉壺山人

高眉山 茶山 椒塢山 正德蘭谿縣志在縣東

北二十五里羣峰環拱境最幽勝茶山在高眉左

偏椒塢山與高眉相接

密山 蘭谿縣志在縣東北三十里平野中突起高數十丈上有觀音巖巖中怪石如笋巖上有佛迹

又名佛迹山

白露山 萬歷金華府志在縣東北三十餘里一名

玉帶山

始豐類稿其山頂趾皆青腰色微白故號玉帶

屏風山 名勝志在縣東北三十里山有小洞泉水

噴出大旱不竭

白鶴山 名勝志在縣西北二十五里傳為白鶴仙

人煉丹處

五隴屏山 正德蘭谿縣志在縣西北三十五里

白雁山 嵌山 桂峰山 嘉靖浙江通志俱在縣西北四十里

三峰山 萬歷金華府志在縣西北四十里峰之巔俗傳為葛稚川煉丹所丹井尚存下有巖廣三丈許其深莫測

玉泉山 貝瓊玉泉隱居圖序距蘭谿五峯之北嶺

然青芙蕖危挿天半與金華東西相望

盤山 蘭谿縣志在縣西北五十里頂平如盤可一  
里許四圍皆累石為巖

大家山 唐書地理志蘭谿有大家山

陳嶺 萬厯金華府志在縣西二十五里硯山之西  
石道迢迢千有餘丈外接龍游壽昌之界

馬嶺 金華府志在縣北五十餘里當蘭谿建德之  
界



大慈巖 蘭谿縣志在縣西北五十里與壽昌接境

巖中有佛像巖左有觀音洞高二十餘丈

小三洞 吳師道小三洞記洞周數里峻拔百餘丈

石骨巉然有小三洞皆與金華洞通上洞名白雲

下洞名湧雪中洞名紫霞

于石題小三洞詩四山回合向幽泉古木蒼藤

路屈盤一局殘棋雙鶴去石屏空倚白雲寒洞門相對是吾家朝看烟雲暮看霞鐵笛一聲山石裂  
老松驚落半崖花斷崖怒涌四時雪虛壁寒凝  
六月霜倚樹老僧閒洗鉢碧桃花落澗泉香

靈洞源 金華府志傍皆奇峰怪石其中一道如砥

窈窕十餘里楊梅茶筍之利出焉

蘭溪 萬歷金華府志在縣西南二里一名澱水其源有二一自衢城東北流至於縣謂之衢港一自婺城西流至於縣謂之婺港二水合而匯於縣之

西南類羅穀文因號穀水崖多蘭蔭故名蘭溪

蔭天

錫蘭露舟中詩水底霞天魚尾赤春波綠占白鷗汀起舟一葉蘭溪上載得金華一半青汪廣洋蘭豁棹歌涼月如眉挂柳灣越中山色鏡中看蘭溪三月桃花雨夜半鯉魚來上灘程鉉遇蘭谿詩寂寞寒江擊棹還好風今日一開顏人家岸岸藍花上秋色山山楓葉間牧笛自吹斜照徑酒旗不斷

泊船灣釣竿生計他年  
穩準擬編芻此築闢

香溪 蘭谿縣志在縣北武昌鄉即蘭谿之下流

大梅溪 萬歷金華府志一名龍門水在靈泉鄉源

出於浦江之大洪嶺會納衆流至金家梁而入於

大溪下五里為白雁灘十里為山河為望雲灘以

界於建德縣由是歷嚴灘桐廬富陽北入於錢塘

江

白泉 金華府志在香溪市南

范浚白泉志距吾廬  
不能五十步有泉激

激出石竇間色乳味飴與他泉不類因坎竇下鍾其源以供家奴旦暮澼挹且醜溢流而渠之與里人同其甘鄰曲來汲日數百器泉之儲洩常自如雖歲甚旱焦川枯堅而泉不知也渠之泛溢而走下者與南澗合流以西亂於香溪汨汨窮晝夜吾知其不至海不止也夫泉之甘而利人也類有德其不涸也類有本其趨澗溪而期於海也類有志人之育德有本能日進而期於道則其淵深宏大也必矣吾於泉有感也於是乎志

東陽縣

孔山 嘉靖浙江通志在縣東南二百餘步

青臺山 名勝志在縣東二十里高三十丈周二十

里以山色長青故名

覆舟山 嘉靖浙江通志在縣東五十里高五十丈  
周八里狀如覆舟

嵬山 東陽縣志在縣東五十里高百丈周十里端  
整若巨屏凡六面上有井三十六

豹山 金華府志在縣東五十四里遠望如豹故名  
天竺山 東陽縣志在縣東六十里高一百六十丈  
周二十里山多修竹

玉山 萬歷金華府志在縣東一百五十里舊名封  
山界於天台

夏山 名勝志在縣東南四十五里高七百丈周二  
十里山巔有池廣二丈深四尺冬夏不涸側有禹  
廟故山以夏名

石洞山 舊浙江通志在縣東南五十五里

歌山 金華府志在縣東南七十里上有石室可容  
百人山下水通臨海有玉女祠唐書地理志東陽

有歌山

名勝志昔人乘舟見女子汲水山下登岸而歌姿態端美舟人挑之神怒乃墮三大

石以塞水源遂不通舟

瑞山 東陽縣志在縣東南九十里亦名鑾輿山金

華府志界於永康

大盆山 萬歷金華府志在縣東南一百三十里周

一百三十里形如覆盆故名稍下為小盆山在永

康地二山實諸山之祖

三丘山 名勝志在縣南八里高三百二十丈周二

十餘里一名峴山

韻語陽秋峴山去東陽縣三里舊名三邱山宋殷仲文素有時

望自謂必登台輔忽除東陽太守意甚不樂常登此山慨然流涕郡人愛之如襄陽之於叔子因名

峴山二峯相峙有東峴西峴唐寶厯中縣令于興宗結亭其下名曰涵碧劉禹錫有詩云新開潭洞

疑仙府遠寓丹青到雍州即其所也喬行簡游三邱山詩疑是乘風到九天不知身在此山巔萬家

攢簇炊烟底一水縈紆去鳥邊便覺塵緣輕似羽何妨詩意涌如泉停盃更待林梢月歸去家童想

未眠

月山 金華府志在縣南六十里盤屈於檉溪之北

以形名



甌山 元豐九域志甌山其形似甌名勝志在縣西南  
南十里高三百二十丈周二十里寰宇記崑山頂  
上有孤石高三十丈其形類甌即此山也下有白  
雲洞深五丈廣如之

八華山 天啟東陽縣志在縣西南四十里金華許  
白雲講學於此

馬鞍山 東陽縣志在縣北一十二里高八十丈周  
六里與前勒馬峯正對故名

金山 萬歷金華府志在縣北五十里迤邐至畢嶺  
界於諸暨

赤石山 名勝志在縣東北十里一名孤絕山上有  
赤厓不生凡木

鶴昂山 東陽縣志在縣東北二十七里高二百丈  
周五十里巖有三石如鶴昂肩竦立故名亦名鶴  
巖其上有風穴風從中出鉤然有聲

白鹿山 金華府志在縣東北六十里山形似鹿故

名

西白山 東陽縣志在縣東北六十里周二十里高  
七百丈諸暨諸山皆在其下

東白山 萬歷金華府志在縣東北八十里周五十  
里嶽嶽危峭與會稽天台連屬

稠巖山 萬歷金華府志在縣西北二十五里山有  
石室深廣十餘丈巖巒叢互故名

靈嶽山 舊浙江通志在縣西北五十里

九州尖 金華府志在縣東百餘里高諸山五百丈  
周二十里上有潭冬夏不涸以可望見九州故名  
錢嶺 天啟東陽縣志在縣東七十里輿地志云東  
陽畢嶺之下有錢嶺往往人於此獲大錢

馬駿嶺 萬歷金華府志在縣東二百四十里嶺勢

險峻延袤三十里為發台之咽吭

互見永康縣

南午嶺 金華府志在縣南十里溫處台閩必由之  
道

烏竹嶺 萬歷金華府志在縣東北四十里逶迤數

折與鷺鷥嶺蒿嶺大小嶺相連為北境之關隘

白峰嶺 金華府志在縣東北七十里高三百丈石

棧縈紆東通嵎縣

鮑令巖 方輿勝覽在縣南五里涵碧亭之上元豐

間知縣鮑拯率僚屬來修楔事唐最磨崖書鮑令

巖三字

烏舞巖 金華府志在縣南七十里高五百丈上寬

平可容千人唐馬將軍陳都使共置寨於此拒賊  
旁有羊巖金仙巖

白雲洞 萬歷金華府志在縣西六里中有玉女盆  
瀑布珠壁石乳諸勝

練湖 天啟東陽縣志去縣東六十里明月之宵遠  
望水如匹練故名

畫溪 名勝志在縣西南三十里一名東陽江羣山  
縈連草木如畫故名迤西而南十里曰橫溪又折

而南五里曰荆浦溪其源皆出大盆山西入義烏縣界與東陽溪合

東陽溪 嘉靖浙江通志在縣北三里源出大盆山東北入縣導義烏之水南會於畫溪至郡城又東南合永康之溪

義烏縣

雞鳴山 名勝志在縣東五里昔有金雞鳴其上羣雞皆鳴故名山高五十丈前瞰縣郭傍臨大溪俗

以九日登高於此亦名登高臺

石門山 萬歷義烏縣志在縣東九里連山中斷兩

山對峙如門

南山 名勝志在縣東十五里蟠折縈紆廣袤數里  
上有平土可耕人多居之鮎溪之水出焉

鐵巖山 嘉靖浙江通志在縣東二十里俗名郭公

山高峻峭拔山半有水簾下垂數十丈山頂曠土

幾百畝有三塢一潭



石樓山 萬歷金華府志在縣東二十八里周十三里兩山相峙狀若浮圖東西皆有巖深袤數丈東巖有坳西巖有石如闌干外稍西又有數穴方輿勝覽層級高下如重樓複屋蓋絕勝之地也

武巖山 義烏縣志在縣東三十五里高數百丈周十餘里狀如紗帽其下有八景左滴水巖四時流注不絕

龍門山 崇禎義烏縣志在縣東南二十五里自山

口循澗水磬折而行過師姑潭石井坑登樓梯巖  
有平岡橫亘其上是為龍門旁皆平壤民多耕桑  
其間絕頂兩峰對峙名雙玉峰俗呼雙尖南下蘭  
嶺俯瞰深谷澗水經其中西流入於畫溪

畫塢山 金華府志在縣東南二十五里畫溪之水  
經焉其上中流為斗潭其下對岸為石壁

齊山 義烏縣志在縣南十里青巖山中高三十丈  
下有雙澗南曰前溪北曰梅溪

雲黃山 萬歷金華府志在縣南二十五里一名松

山梁傳大士於此行道黃雲盤旋其上狀如車蓋

故名有峭壁高百丈下臨畫溪五色交映

黃潛雲黃山詩

東髮弄文史挂席去瀛壖邂逅乖良會屏落迨茲年息景念生理洗心賓象筵恭惟上皇代異人祕

靈詮宗師既逾海茲山亦栖賢金棺滅雙樹寶篋藏紅蓮仰窺攝誘切信知願力堅內愧實菲薄冥

通未精專寡裳碧峰雨焚香石林烟綠翠何紛紜苔徑窅徊沿尋幽非外適蘊真冀重宣豈伊俄頃

用應謝平生緣

石牛山 宗禎義烏縣志在縣南二十五里雲黃山

北石狀如牛上有石牛祠

蜀山 金華府志在縣南四十里下臨蜀墅塘相傳  
秦末有三山飛空而過一山墮此蜀人來言蜀中  
所失之山故名山多靈草上有壇曰仙壇洞曰陽  
春洞

葛仙山 萬歷義烏縣志在縣南五十里高一百五  
十丈有煉丹石

八寶山 萬歷義烏縣志在縣南五十里妄傳有礦

嘉靖三十七年間永康處州礦徒數千人訐聚開坑知縣趙大河率近山居民平之

大寒山 嘉靖浙江通志在縣南六十里山頂有池四時不竭春夏溢出為瀑布

來山 名勝志在縣南七十里高二百五十丈羣山遠來至此而止故名山側有羊印石

香山 義烏縣志在縣西二十五里其地多楓香木因名上有香爐峰前有龍井遇旱禱之輒應又有

夫人峰以梁樓偃妻葬此故名隋書地理志東陽郡烏傷縣有香山

五雲山 名勝志在縣西四十里唐天寶中有五色雲彌漫峰頂故名五雲溪之源出焉

金山 萬歷金華府志在縣西南四十五里屹立江流中

黃蘗山 金華府志在縣北二十里一名黃蘆尖唐

初置綢州於此山之下

黃潛淨居寺記山在烏傷北望之森然其起如鷲其

伏如踞其支而出也如趨如附亘  
二十里靡迤而不絕抵縣治乃已

洪堂山 義烏縣志在縣北三十三里黃蘗山北麓  
馬踏石南樞尖楊公馬鞍諸山環列於後右瞰廣  
輪綢香諸巖在其前左顧四正雲黃四周如畫

馬鞍山 崇禎義烏縣志在縣北二十五里高四十  
丈在馬踏石之東形如馬鞍故名絕頂有手掌痕  
甚鉅五指宛然

清潭山 嘉靖浙江通志在縣北四十五里山下有

清潭酥溪之源出焉流出了口與深溪合流入豐  
江山山頂有鷹嘴巖旁有戰巖方臘寇時居民多  
避於此牆址猶存

鷄栖山 義烏縣志在縣北四十五里一名金峰山  
北有降魔峰西北有安貴嶺

龍祈山 金華府志在縣北四十八里山之西有深  
溪西北流入浦江歲旱居民祈禱故名

東山 嘉靖浙江通志在縣西北二十五里崇巖峭



壁竹木森蔚

黃山 萬歷金華府志在縣西北四十五里下有斷坑相傳黃巢入寇遣壯士鑿石為之其上巖石如甃深數十人中多伏翼山左有螺井根溪之水出焉

烏櫛峰 萬歷義烏縣志在縣東四十五里本名烏巖又一在縣南二十五里宗巒秀異岡阜紆迴名曰盤谷

七佛峰 崇禎義烏縣志在雲黃山上梁傳大士行

道七佛相隨於此故名

綢巖 萬歷金華府志在縣西北二十五里巖巒稠  
疊故名唐書地理志武德四年以縣置綢州因綢  
巖為名

上巖洞 崇禎義烏縣志在縣西北二十五里綢巖  
之北山腰有石巖深數丈廣如之或云晉丹陽令

葛洪隱此

黃潛游上巖洞詩晚色微茫尚帶星修  
溪華嶺斷人行獨支瘦竹身猶健高入

層雲地忽平落月正當山缺處細泉頻作雨  
來聲上方燈火青林曲隱隱疎鐘一再鳴

繡川湖 名勝志在縣西一百五十步周九里三十

步山川花木掩映如繡故名

宋濂集華川書舍記  
烏傷有大澤曰華川

唐武德間常置華川縣不久而廢今之所謂繡湖  
即其地也王禪春日繡湖與德元同行詩十里華  
川上年來足勝游雨花林下寺風柳驛邊樓漠漠  
芙蓉浦依依杜若洲平生身外事應許付沙鷗

東江 萬歷金華府志源出東陽大盆山漢史所謂

烏傷溪更名義烏溪皆因縣以名

深溪 金華府志在縣北十五里源出龍祈山至浦

江界合於浦江

演溪 義烏縣志在縣北二十里北流至浦江新界  
並入諸暨豐江

吳溪 萬歷義烏縣志在縣南三十里源出杏嶺至  
楓坑口西南過王村至丹溪而與婆塘坑之水合  
因名小雙溪又西北流而峴溪合之至黃蒲潭同  
入大溪

大士井 崇禎義烏縣志在九里江之南泉甘色碧

過旱不竭相傳傳大士所穿飲之療疾今名善慧泉

孝子井 金華府志在烏傷墓旁

永康縣

峴山 名勝志在縣東二十里高一百丈衆山排列狀如峴首

魁山 萬厯永康縣志在縣東二十里

方巖山 永康縣志在縣東二十里高二百丈周六

里平地拔起四面如削惟南通一道至山腰而絕

鄭東白游方巖山記山如削壁從天而下高數百丈舊時好事者架為飛梁石梯護以石闌逶迤曲折而上將至絕頂有兩巖相峙為關關有門門上有樓曰透關自關而上平曠約百畝中有一池方畝餘水清瑩大旱不竭上有佛廬曰廣慈寺寺後有巖高數仞巖下有石洞深二丈廣倍之僧構為屋以供佛西巖有石穴曰讀書巖即胡侍郎絃誦之地

石翁山 金華府志在縣東四十里俗呼公婆巖太

平御覽東陽記山有孤石望如人坐其傍又有石

似新婦著花履焉或名新婦巖

南山 青石山 舊浙江通志俱縣東四十里

龍窟山 萬歷金華府志在縣東五十里山陽有小  
空洞宋陳亮讀書於中其墓存焉

桃巖山 金華府志在縣東五十里山石赤白相間

狀類桃花下有洞可容千人有朱文公呂東萊講

讀遺跡

黃潛過永康桃巖詩立石平如削飛巖近  
可梯莫窮千古勝但惜衆山低靈草經春

長珍禽隔樹啼人言  
舊朝士感事有留題

壽山 萬歷永康縣志在縣東五十里山有五峰皆

石壁平地拔起周圍如城郭有大石洞高敞軒豁  
可容千人其中為佛刹曰壽山寺前為重樓樓上  
為平臺周以闌楯皆即洞支木為之不施椽瓦而

雨雪霜露自然莫及最為一方登覽之勝

李羣游壽山詩

雙澗橋西見五峯分明朶朶翠芙蓉半空絕壁開  
金像百道飛泉噴玉龍怪石坐來斜聽鳥曲闌凭  
處倒看松平生自倚凌雲筆不愧山僧飯後鐘

橙尖山 嘉靖浙江通志在縣東五十里高二百丈

周二十里峰巒峭拔人所共瞻相近曰銅山嶺



石室山 名勝志在縣東南三十里高百餘丈緣崖

而上南北二穴相通可容數百人中有石柱

李畢題石

室山詩石室初從混沌分呀然一竅氣氤氲山僧  
慣住龜黿窟野老能穿虎豹羣行怪帽簷常礙蘚  
坐驚衣袖忽生雲幾時更借  
禪床卧六月松聲絕頂聞

靈巖山 永康縣志在縣東南四十里高四百丈周

五里峭壁拔地其巖東西橫列紫色斑錯青蘚枯

木嵌之蒼藤倒掛若畫屏然緣巖架石梁曲折而

上有洞南北相通高丈餘廣五丈深二十丈形勝

靈異故曰靈巖

宋施海靈巖山詩不到靈巖二年重來風景故依然三光每隔須

彌頂一竅誰字混沌先佛向壺中間淨域僧從井底望青天玉堂無復金蓮夢暫借僧床半日眠

方山 萬歷金華府志在縣東南五十里山最高升

其巔下瞰縉雲武義東陽義烏諸縣山川一目可

了

斗潭山 萬歷永康縣志距縣東南五十里上有三

石潭水清泚可鑑毛髮

金勝山 永康縣志在縣南五里高二十丈橫列縣

治前若几案然太平寰宇記郡國志云昔有人於  
此拾得金勝因名山有趙炳祠炳善方術祠今無  
蚊

石城山 太平寰宇記在縣南一十四里上有小石  
城云黃帝曾游此遙望山際四圍崦岈如雉堞然  
白雲山 金華府志在縣南十五里直儒學前危峰  
數百丈端拱如賓時有白雲繚繞其上相近曰伏  
翼巖石穴多棲伏翼縣之望山也

絕塵山 永康縣志在縣南三十里俗呼東溪山高  
五百丈周十里四面峭壁拔地石峰巖列一徑縈  
紆斜穿巖石間以達於頂有兩石對峙如門其中  
周圍如城有田六十畝地倍之有大井常汲不竭  
歷山 金華府志在縣南三十五里一曰釜瀝山高  
峰負聳狀如覆釜山頂有潭禱雨多驗

大廚山 永康縣志在縣南三十里高聳而方形如  
立廚故名

三石山 東山 舊浙江通志俱縣南五十里

霞裏山

一名龍虎山

嘉靖浙江通志在縣西三里盤旋

環顧為縣治水口之鎮

石牛山 嘉靖浙江通志在縣北二十里山巔有石

如牛

鬬牛山 萬歷永康縣志距縣東北四十里山背兩

石相觸狀如牛鬬其下為烏傷侯趙炳祠

鳳山 萬歷永康縣志距縣東北四十里一峰拔地

聳起狀如偉人岸幘而坐俗呼為尖山永康縣志  
旁挾兩隴如鳳之展翼故名

三峰山 嘉靖浙江通志在縣東北四十五里南北  
兩峰皆高一百丈中峰高七十丈蒙茸峭絕特異  
諸山縣治之祖山也

華釜山 永康縣志在縣東北五十里周二十里高  
百丈餘其上平曠中窩旁高狀如仰釜左為畫眉  
巖右為棲霞洞當華釜棲霞兩山夾處曰金城坑

密浦山 萬歷永康縣志去縣東五十里華溪之水  
發源於此

雲巖山 懷歸稿金華之永康有山曰雲巖拔起天  
半有巨舟藏壑中舟尾翹出如蠆

馬鬃嶺 萬歷永康縣志距縣二百二十里蓋縣之  
極東鄙也踰嶺達於仙居縣嘉靖三十三年倭寇  
犯台城縣於嶺上築砦屯兵以備焉

互見東  
陽縣

石霞嶺 萬歷永康縣志距縣東一百三十里上有

池曰日月潭廣畝餘澄深莫測潭上石壁有赤白痕相間狀類日月俗又呼百丈潭迎龍禱雨極為靈驗

八盤嶺 萬歷金華府志在縣東八十五里其勢高嶮石道路通天台縣

杳嶺 金華府志在縣東北五十里一曰豐嶺石路崎嶇通義烏縣

岡谷嶺 永康縣志在縣南十八里大尉山之東上



有地平坦泉水出焉正統十四年枯寇竊發里人  
結寨於上以禦之

石倉巖 金華府志在縣東北四十里緣巖西上石

竇玲瓏相傳洪雅禪師修真之所巖頂有小石倉

華溪 萬厯金華府志在縣治東源出密浦山流至

縣合於南溪又西合大洞溪入武義縣界下流至

於郡城此即所謂永康港

童璫華溪詩華溪釣隱  
誠自豪齊門操瑟非吾

曹綸竿百尺水雲渺鐵笛一聲山月高放鶴引尋  
紫芝洞得魚醉卧滄江濤黃塵滿地不歸去萬里

天風吹  
布袍

南溪 金華府志源出縉雲土母山折而東至縣治  
會於華溪

酥溪 萬厯永康縣志源出二十都峽源坑歷長田  
曹園下溪紫柏為酥溪過橋合於華溪

李溪 永康縣志源出四十四都峽上南流至碧湍  
西至石室山周其麓又西抵官山轉而北至水岵  
巖入於南溪

武義縣

白陽山 萬歷金華府志在縣東七里上有異石色  
隨時變歲豐則黃歉則黑鄉人以此占候晉張彥  
卿為永康令栖於此元豐九域志昔陳留阮遙集  
之弟妻劉氏伶小女性好山水隱於此山

小姬山 名勝志在縣東十里中有姬水溪舊經云  
晉金談為吳興太守辭疾隱此

竹巖山 萬歷金華府志在縣東一十四里鎮山也

明招山 金華府志在縣東一十五里宋東萊呂成

公講學於此正德十三年縣丞林有年立碑以昭

先賢遺跡

講堂山 武義縣志在縣東二十里梁劉孝標讀書

處

潘偉講堂山詩石室扳躋上蒼藤敞結門巖陰  
生雨滴碑篆合苔痕天浸浮圖窟人從虎豹蹲

講筵尋轉邃  
佇立白雲根

蠟屐山 萬歷金華府志在縣東二十里晉阮孚之

裔多居其下

蔣富山 嘉靖武義縣志在縣東南三十五里周二

十餘里山多產茶傳云昔有蔣氏居此致富因名

金柱山 武義縣志在縣南二十里上有懸瀑如巖

菊姬山 金華府志在縣南三十里多生蘭菊旁有

姬水溪故名

白華山 名勝志在縣南四十里近山半里二石夾

道若門歷此曲折險逕至山中一石突起若蓮座

昔有支大士居之名大士菴

湖山 嘉靖武義縣志在縣西二里山有潭水故名  
歲旱鄉人視山為候凌晨有雲氣是日必雨

書臺山 嘉靖浙江通志在縣西三里相傳唐舒元  
輿讀書於此

蝴蝶山 武義縣志在縣西二十里王世名報父仇  
處過者咸指為孝子舊迹云

大家山 新婦山 名勝志在縣西二十里二山相  
向世傳晉時張彥卿女出適累月姑婦並亡有神

靈各主一山每大家山起雲新婦山即雨

銅釜山 萬厯金華府志在縣西三十里形如覆釜  
正統十四年鄉民多避兵其上時名銅釜寨

青龍山 嘉靖武義縣志在縣北九里巖高五十丈  
周三里遠望如青龍上平曠有小石洞登眺之勝  
境也

李公山 金華府志在縣北一十五里周二里宋隱  
士李惠居此故名

八素山 萬歷金華府志在縣北四十里周二十里  
東陽山水記云秦末有八士從洛陽來逋栖於此  
皆青素冠履因名唐太和八年廉察使牒縣附之  
圖經而姓名竟不傳也

燕山嶺 嘉靖浙江通志在縣西南十里正統十四  
年尚書石璞統兵過此勦截處寇改名烏龍嶺  
玲瓏巖 嘉靖武義縣志在縣東四十五里石竅玲  
瓏相透若斲成者因名



劉巖萬歷金華府志在縣西五十五里昔劉氏栖  
隱之所因名石室深廣五十丈曰仙都壇正統十  
四年避寇於此者萬計竟免於患

熟溪嘉靖浙江通志在縣西南源出處州遂昌界  
流入縣西又東南流與永康溪合

大家溪金華府志在縣西二十里源出大家山流  
入金華界與駐石溪合

八素溪萬歷金華府志在縣北四十里源出八素

山入金華界合入雙溪之南港

九里潭 武義縣志在縣東南九里風雨晦冥之夕  
鐘聲隱隱出潭中歲旱祈禱輒應

浦江縣

龍峰山 崇禎浦江縣志在縣東二里高三十丈周  
二里其支隴自仙華山一帶逶迤而來環於縣左  
其巔有塔曰龍德塔之後曰東峰峰之後復有山  
曰壽峰三山相屬蓋縣治東之輔山也

伏蟾山 浦江縣志在縣西一里高十餘丈周一里

其支隴自杭口山逶迤縣右縣治西之輔山也

湖山 金華府志在縣東十里兩山對立江水中流  
又名湖山峽

金芙蓉山 嘉靖浙江通志在縣東二十五里一名  
香巖山白麟溪之源出焉

登高山 萬厯金華府志在縣東二十五里相傳宋  
呂伯恭九日於此登高故名

元麓山 金華府志在縣東二十六里下有飛泉宋

濂與鄭元麓先生

名宗岱

數觀之作飛泉操書諸崖

石

東明山 浦江縣志在縣東三十里大澤中隱然突

起旁有水一泓曰靈淵淵東百步有泉老梅橫亘

其上曰梅花泉

青蘿山 萬歷金華府志在縣東三十里

鷄冠山 浦江縣志在縣東三十里至高天清明時

可俯瞰二百里外蒼茫中見一綫微白者蓋錢塘江也名勝志相連三十六岡重巒疊嶂前後相屬石牛山名勝志在縣東南三十五里山側有池池中  
有石牛水涸即見

康侯山 崇禎浦江縣志在縣東南三十五里一名官巖唐僧祖登禱雨處高一百餘丈周十五里山皆赤黑色其勢拔起羣峰間東西視之形各不同或如覆盆或如人髻或如人側首而蹲山半有穴

若屋可容十餘人絕頂稍平有宋胡侍郎廟廟旁  
小池夏冬不竭深三尺周二十五丈久雨不增大  
旱不減

黃墅山 金華府志在縣東南五十里又十二里界  
於諸暨

周公山 嘉靖浙江通志在縣南十里一名周公尖  
又名雷公山狀若巨人折而西曰辛山曰保安山  
山頂有巖巖下有罅深不可測相近曰五路嶺高

一百餘丈長五里自縣入郡城所經也

白石山 嘉靖浙江通志在縣南十五里山有潭宋  
嘉定三年勅封靈澤槁溪之源出焉東流入浦陽  
江以其溪流常涸故名

烏蜀山 名勝志在縣南三十里突然中起衆峰羅  
列梅溪之源出焉

深裏山 名勝志在縣西南五十里重峰複嶺峭拔  
千仞其下溪流清澈即浦陽江源所出也

元史吳  
萊傳萊

舉進士不第退歸深裏山四方學者稱曰深裏先生吳萊深裏江源詩半遠山根但一窪真源鑿破杳無涯清澄灌或於陵園窈窕尋猶博望槎積雨衝隄蝸自國微烟冪渚鷺專沙欲行復坐皆雲水  
只屬騷人  
與釣家

壺盤山 萬厯金華府志在縣西南五十五里在金華北山之北高出衆山至蘭溪縣界

四全山 浦江縣志在縣西十五里類金木火土四星故名

藥壺山 萬厯金華府志在縣北二里一名寶靈巖



仙華山 名勝志在縣北八里一名仙姑山又名少

女峰相傳軒轅少女於此上昇故名高一百五十

丈上有五峰東溪之源出焉中一峰與東峰尤極

峻懸厓百仞有穴深黑風從中出崇禎浦江縣志

再左一山名華柱山其間層嶂疊翠峭崿嶙嶒懸

巖千尺下臨幽絕隆冬積雪清冷徹人肌骨吳淵

穎稱如芙蓉翠蓮又如彩鳳騰霄誠一邑之勝槩

縣治之主山也

謝翱游仙華巖誌記由月泉至仙華巖麓十五里蓋余向所記若芝

掌掌空而立者故老相傳以為下有穴與鼎湖通  
常秋夜聞水樂及擊石聲月高風遠復不知墮在  
何處將至二三里有山類藥壺倚巖側雲嵐草木  
相掩映日東影射其上遠望氤氲若丹光浮動疑  
是中別有一天地也

寶掌山 萬歷金華府志在縣北八里與仙華山近  
唐寶掌大師栖禪處前有高巖號飛來峰浦陽山  
水惟此與仙華為最勝

茅廬山 崇禎浦江縣志在縣北十五里高百丈廣  
三十餘丈橫亘八九里上有峭壁疊嶂層巖諸山

四面環拱若屏幄然浦之名山前數仙華叅天王  
筍巔瓠玲瓏後數茅廬拔地金城莊凝突兀並稱  
奇秀云

小孤山 嘉靖浙江通志在縣北三十里巉巖險峻  
人不能升又北十里曰大孤山峭削壁立上銳下  
直無可攀援而旁巒環伏映帶清流峙交翠蓋  
獨勝也又有赤巖山在衆山間

響巖山 崇禎浦江縣志在縣北五十里巖石推下

有聲故名大湫與檀溪二水流其下踰盤州金沙  
環折萬山間流入富陽江

九靈山 萬厯金華府志在縣北五十里山有九峰

元戴良居於其間

戴良望九靈山詩九靈渺何許連峰高不極依稀接遠露仿像

起寒色我家是山下別來歲頻易屋廬閑鳥聲冢墓遺獸跡可望不可至空多故鄉憶

左溪山 崇禎浦江縣志在縣東北二十五里山有

唐僧元朗墓在亂石間前有巨石高一丈相傳卯

風太急移石鎮之因名卯風石

巖坑山 崇禎浦江縣志在縣東北五十里山水分

流東曰巖坑北曰湖溪水抵富陽以達於浙江

江公山 浦江縣志在縣東北六十里山形如鷄足

高出羣峰之表登眺越中諸山在指顧間

清遠山 洞天福地記第十六福地在浦陽縣

箕簞嶺 嘉靖浙江通志一名斤竹嶺在縣東北九

十五里下有斤竹澗界於富陽

浦陽江 萬厯金華府志一名浦陽汭在縣南界謝

惠連詩昨發浦陽汭今宿浙江湄韻譜云水之相  
入為汭源出縣西深裏山東北流至諸暨縣又東  
北流入臨浦灣以入於海按浦陽江本吳越三江之  
一春秋外傳所謂三江環之者是也江水雖微而  
與吳松錢塘並稱者獨入海也

白麟溪 浦江縣志在縣東二十五里其源出金芙蓉山麓東流入浦陽江

謹按元義門鄭氏家於溪側其後人名  
濟者集名賢貽贈詩文為白麟溪集

湖溪 萬歷金華府志在縣北二十里源出巖坑山  
北流抵富陽縣界以達於大江

月泉 崇禎浦江縣志在縣西二里源出縣北仙華  
山之下其泉視月盈虛為消長宋政和三年知縣  
孫潮疏為曲池築亭以備遊觀歲久湮塞嘉定十  
六年縣尹趙崇萊治之咸淳三年知縣王霖龍築  
塘以瀦泉東南三十步有大阜上有亭曰高遠

孝感泉 浦江縣志在縣東二十五里按圖經在白

麟溪側宋鄭綺母張性嗜溪水值旱鑿數仞不得  
泉綺乃慟哭三日不息水為湧出人以為孝感所致

寶掌冷泉

柳貫詩注在寶掌山唐千歲和尚道場

巖竇出泉極甘寒

柳貫寶掌冷泉詩一勺曹溪未  
是甘刺山容易出飛泉消融太

古岷峨雪澄映中秋沆瀣天挂樹青猿窺洗鉢眠  
沙白鹿伴安禪巖龕無縫身如石逆數高僧入定  
年陳樵寶掌泉詩屋上無端雨亂飄雨留石罅碧  
寥寥浮光出穴藏丹淺浣水為花到地消石髮年  
深長滿洞玉魚春冷未生苗泉中  
自是蛟龍窟頃刻陰雲滿樹腰

湯溪縣



西霞山 萬歷金華府志在縣東十五里緝塘遠於其畔

吳山 金華府志在縣東南二十里山頂有小菴菴前澄潭碧水翠色濃陰為湯邑名山之勝

屏風山 湯溪縣志在縣東南四十里與香爐山相對

福民山 名勝志在縣東南四十里高數百丈林木蓊鬱山頂有廟層樓疊閣遠挹數百里又十里為

香爐山狀若匡阜卓然雲表旁列衆峰環列競秀  
青峰山湯溪縣志在縣南十里白石巖山相連高  
五百丈周五十餘里每天陰霧罩則穴中氣騰人  
多怯行

九峰山名勝志在縣南十里高數百丈峰巒秀拔  
巖洞玲瓏唐徐安貞肄業於此石榻猶存萬厯湯  
溪縣志一名風子山先賢龍邱萇仙人鄭去奢俱  
家於山下

趙抃九峯山詩龍邱石室人難繼安正  
書堂世莫登欲識松蘿最高處九峯排

列一  
層層

時和山 舊浙江通志在縣南二十里嘉靖浙江通  
志又五里曰淨塘山又五里曰靈泉山曰下甘泉  
山又南二十里曰眺遠山曰上方山曰金魚山一  
名魚潭山又十里曰黃甲山曰迴龍山又南十里  
曰章甫山

仙舟山 萬厯湯溪縣志在縣南三十里其山四面  
如一

天竺山 嘉靖浙江通志在縣西南二十五里又五里曰綵雲山

青雲山 嘉靖浙江通志一名玉葉山縣西七里又西一里曰古城山迤南二里曰塔山

五龍山 嘉靖浙江通志在縣北三里又北二里曰擂鼓山野老相傳古勸農時擂鼓督耕之地也

梅家山 湯溪縣志在縣北五里因梅科兄弟家焉故名

紫芝山 湯溪縣志在縣北五里有牧雲菴

一峰 湯溪縣志在縣南十里形如覆盂高不數丈  
奇松茂竹可供游玩

市聚嶺 金華府志在縣東南七十里商旅會於此  
必衆而後行以達於遂昌縣界

蘭源 萬厯湯溪縣志在縣西南十里其地出玉蘭  
無葉而香每歲清明時一發

苦竹源 萬厯金華府志在縣西南二十里

澱江名勝志在縣北二十里上接盈川下通蘭溪

其水縈洄如澱紋故名

金寔澱江詩鮫人宵織靈虛宮雙垂練帶光涵空玉

梭飛殘半鉤月千尺平鋪白如雪輕烟縹緲霧迴煖  
紋東風翦斷春無痕遠山飛嵐蘸新綠潛蛟吹濤  
細花簇越羅蜀錦不勝裁夜夜蘭江展銀軸秦松  
齡澱溪詩細浪真如澱清川舊得名斜陽過水碓  
雜樹間春耕草綠偃王廟雲陰姑  
蔑城前途灘正急濁酒暫時傾

大湖萬歷湯溪縣志在縣北十里計一百八十畝

與小湖相接小湖計四十六畝餘

白砂溪嘉靖浙江通志在縣東南三十里自遂昌


界北流至金華入於永康溪出白石

求湖 湯溪縣志在縣北二十里寬八百餘畝其中  
張氏村落在焉湖環繞於旁僅西面有路可通所  
產菱藕鷄頭之屬及所蓄魚尾歲以數千計居民  
利之

琳湖 湯溪縣志在縣北十五里水色蒼瑩如玉環  
遶數里

白龍溪 湯溪縣志在邑東自宣平遂昌二縣之水

會於石阡湍悍澎湃折而北注蕩為巨浸發衢間  
一要津也



浙江通志卷十七